

說郛

正六十四

特  
12  
6  
64





412  
6  
64

說郛目錄

身第六十四

入越記 呂祖謙

吳郡錄 周必大

廬山錄 周必大

九華錄 周必大

金華錄 方鳳

大嶽志 方升



說郛目錄 身第六十四



入越記

宋 呂祖謙

淳熙元年八月二十八日自金華與潘叔度為會稽  
 之游辰後出旌孝門五里至關頭南折入會稽路二  
 里桐樹嶺八里東藕塘城東陂塘此為大十五里含  
 香民居頗成聚落道旁野塘水芙蓉初發映水殊有  
 思致十里義井五里上下倉十里孝順鎮十里自驛  
 路北折入香山路五里宿杭慈潘氏莊是日凝陰不  
 開風襲人已有力始御袂四山雲氣滃然岡巒出沒

入越記





二十九日早冒雨行二里小鳳林寺涉溪屈曲稻塍  
間泥淖沒屨五里苦山二十里梅口十五里香山林  
壑稍邃八里下稠巖景德寺寺屋可百年繪事皆朴  
質飯于小軒方池叢竹皆有趣七里唐口自是復出  
驛路老梧離立道旁濯濯如青玉榦又二里宿逆旅  
三十日早發二里石斛橋溪流潺潺岸旁大石如屋  
橋西走浦江道也度橋而北十里石牛有樓臨路樓  
下牖戶亦明敞所謂石牛者道下塘卧石若牛水滿  
不可見五里洞井居民依小坡植雞冠花數百本冠

距低昂大類尸鄉呪雞翁舍雲薄見日已而大霽十  
里新界自石斛橋道出兩山間少曠土至此山圍始  
寬秋稼極目黃雲蔚然五里邵家灣觀五指山其巔  
石如駢拇飯民家舍後水竹可步逢驅羊行賈者數  
百蹄散漫川谷風毛沙肋頓有汧隴秋色五里步楓  
江土俗諺云第一楊子江第二錢塘江第三楓江蓋  
甚言其水波惡實小溪耳聞春夏頗湍悍今僅至脛  
而已南岸有覆斗山山形正方若斗覆五里興樂槿  
花夾道宇廬籬落皆整五里界牌隴平坡淺草隱隱



起伏環山城立真監牧地也五里牌頭市道分爲兩  
北道出漁浦度浙江入杭東道入越輪蹄擔負東視  
北不能十一市傍斗子巖巖旁獅子山首昂背偃畧  
類狡狴五里寒熱阪五里宿硯石村九月一日晨霧  
上橫隴東嶂出日金暈吞吐少焉金璧徑升晃濯不  
可正視升數尺韶於雲絢采光麗因蔽益奇非浮翳  
所能揜露稻風葉皆鮮鮮有生意五里里湖五里蔡  
家塢五里桐木嶺五里諸暨縣入縣北門人煙猶蕭  
疎縣方築社南垣兩松樛枝小異里許至市自縣治

前東折度小橋橋屋半圯矣並大溪行流甚壯其源  
一自東陽一自浦江一自孝義至街亭合流逕縣城  
又逕蕭山浮橋入浙江縣東陶朱山頗雄自入新界  
已巋然見之出縣東門山益遠川原益曠五里放生  
橋道左女貞新葉生黃綠間錯如行閩粵荔枝林五  
里馬秀才店店傍小室隨事蒔花草三里雙橋畝二  
里烏石其南入剡百里而近十五里苦李橋溪磧頗  
清淺木陰扶疎百餘步入山徑五里至新店灣復得  
平地五里栗橋登栗嶺五里冷水望東嶺神祠縹緲



雲間下坂稻穠垂黃際山數十里平鋪如拭洋洋乎  
富哉豐年之象道中所未見也五里宿楓橋鎮薄暮  
小雨二日辨色發楓橋陰風薄穿十里乾溪溪橋擗  
柳數百株有十圍者過橋繞山足行十里古博嶺嶺  
左右皆叢篠五里洪口有別徑入明自楓橋而上美  
竹佳樹相望近洪口曲折循小溪水聲瀲灩風物漸  
佳十里含暉橋亭天章寺路口也遂穿松徑至寺寺  
蓋晉王羲之蘭亭山林秀潤氣象開敞寺右臂長岡  
達橋亭植以松檜法堂後砌筒引水激高數尺堂後

登堦四五十級有照堂兩旁修竹木樨盛開軒檻明  
潔又登二十餘級至方丈眼界頗濶寺右王右軍書  
堂庭下皆杉竹觀右軍遺像出書堂徑田間百餘步  
至曲水亭對鑿小池云是羲之鵝池墨池曲水乃汗  
渠蜿蜒若蚓必非流觴之舊斟酌當是寺前溪但歲  
久失其處耳由曲水亭穿小徑涉溪復出官道數里  
買舟泛鑑湖湖多堙爲田所存僅如溪港然秋水平  
岸菰蒲青蒼會稽秦望雲門諸山互相映發城堞樓  
觀跨空入雲耳目應接不暇入水門過南堰歷府學



天慶觀至禹跡寺門三日游外氏園有梅腋臺菊潭  
杞菊堂竹隱蒲澗橘洲因寺廢地葺治之十六七成  
矣最勝者梅坡遶亭皆梅前對蒲澗橘洲野水灣環  
島淑掩映如在江湖而竹隱一逕深幽堦庭清闕亦  
其次也又過義恩師院院與杞菊堂鄰午後自園後  
門穿僧庵度小橋轉三兩曲至圓通寺面勢端直殿  
廡華敞循舊路復穿園中歸園後邊河岸木成陰舅  
氏云此卽蜀檉木也植之力數年往時表裏無障蔽  
今不復見道上車馬矣杜子美所謂飽聞檉木三年

大信然是日薄陰四日待伯舅同叔度詹季章泛小  
舟出南堰繞城緣鑑湖訪蘇仁仲計師德於偏門外  
砌下瑞香兩本面皆丈餘仁仲蘇子容丞相孫致仕  
閒居年垂八十道前輩事疊疊不厭出舊書數種管  
子後子容手書紙尾銘欵云惟蘇氏世官學以儒何  
以遺後其在此書非學何立非書何習終以不倦聖  
賢可及其曰書帙銘戒者子容所識其曰先公銘戒  
者銘語亦同蓋子容之子所識也歸舟煙雨晻靄游  
大能仁寺閎壯光麗甲於會稽重殿複閣金碧相照



寺吳越錢氏所建五日開霽晴光發窻心目頗快晚  
步過寺橋歷沈氏李氏園皆荒蕪獨修竹猶森然六  
日借石天民潘升度自寺橋直道過郡庠道傍多流  
水喬木殊不類鄜市教授廳後環碧亭小榻環亭皆  
水敗荷折葦秋思甚濃石應之高應朝繼來遂自直  
舍入學夫子殿居中修廊廣庭長松錯列講堂榜以  
明倫後有稽古閣制作皆雄偉而閣下尤勝疏達開  
豁擁墻密竹如雲七日雨不可出過詹季章位小閣  
因重屋樓板其間縱二弓橫半之南北取屋山爲明

遠山竹樹歷歷如畫蘆簟仰承穹窿若船背幽潔極  
可愛名以越舫其狀真類小舟也八日早過大中戒  
珠寺王右軍故宅也屋多人少頗牢落門有兩池亦  
稱右軍鵝池墨池畧無意趣政如天章者皆後人強  
名之耳殿後地漸峻石應之寓居在焉遂與應之登  
雪軒軒占卧佛殿右偏湖山聚落皆來獻狀以宜於  
觀雪得名今雖不與雪值然霧雨空濛亦奇觀也寺  
後卽葢山葢菜名圖經云越王嗜葢嘗採於此九日  
侍伯舅同潘叔度詹季章泛舟經卧龍山下竹洲柳



岸略如茗雪卧枝拂水尤奇中途小泊步游西園郡  
圃也其北飛蓋堂下臨大池其中集春堂四隅各一  
亭東春榮西秋芳南夏陰北冬瑞其南揚波堂面城  
水木幽茂兩小亭對峙東曰逍遙西曰裴回園之西  
卽曲水先入敷榮門右轉至右軍祠穿修竹塢遂登  
山山蓋版築所成繚繞深邃曲逕回復迷藏亭觀乍  
入者惶惑不知南北山背有流杯巖鑿城引鑑湖爲  
小溪穿巖下鍵以橫閘激浪怒鳴過閘遂爲曲水長  
廡華敞榱棟椽柱皆塗鬪象竹遶以清流甃以蒼石

犬牙參錯殆若天成俯砌琢石爲墩流杯至墩傍輒  
自近岸蓋廡中爲三井吸水勢宛然曲水之上激湍  
亭惠風閣規模若都下王公家山頂崇峻庵其脇騁  
懷亭面亭依山爲巖壑下山右遶至情真軒刻楠象  
楫欄平堦茶藤架甚茂第爲蔓草縈亂刺眼耳曲水  
乃前守史丞相浩所鑿往年見其新成今竹樹皆成  
陰而亭榭稍稍圯剝矣復登舟還禹跡十日午後同  
叔度汎舟過南堰出門穿鑑湖支港斜雨入蓬衣袂  
沾濡七里獨山野橋煙樹可畫出山口港漸狹又七



里道樹舍舟步田間泥潦沒屐一里許至堅密庵夜  
分四山風雨愴然始聞秋聲十一日晨起冒雨躡屐  
登舟入城至能仁寺遂過報恩光孝寺寺後飛來山  
卽圖經所謂恠山也傳云自琅邪飛至其說不經其  
巔有塔采絢甚華塔下有鰻井乃小石竅自唐以來  
神之謂鰻能時出祆祥近世不復見矣井故依山坳  
坡陁有古意近僧甃使就整遂無可觀濮安懿王祠  
廟寓此寺有園令領吏卒守之晚還禹跡十二日雨  
不可出借圖經尋近城名山須雨霽徧游晚石應之

來宿十三日過午雨止諸葛壽之高應朝石應之孫  
季和約徃丁氏園遂同汎舟至新河步入園園多海  
檜後墻皆密竹軒楹太敞宜夏不宜冬宿東偏小室  
十四日自丁氏園借叔度輦登舟出五雲門入鑑湖  
湖面獨此爲濶隆興初吳給事葑浚湖末一二尺多  
得古棺皆剝木爲之蓋漢末鑿湖前塚墓也今自五  
雲門重堤隱然達于曹娥五六十里民間謂之省塘  
此乃故湖堤湖田之民每毀堤以決積水故堤缺而  
湖廢異時有意復湖者第修崇省塘則盜湖之田不



待廢而自爲陂灤矣自湖尾入若耶溪過後漢鄭弘  
廟傳所記樵風蚤暮迎送舟楫采薪者云至今猶然  
半里石帆山山橫若張帆又數十步秦始皇酒甕乃  
山脚兩石粗類甕盎又一二里艤舟游龍瑞宮方士  
謂之陽明洞天穿松徑數百步至宮宮後三峯翔舞  
飛動勢若覆壓大略如栖賢望五老特欠其二耳中  
峯乃會稽山祠官春秋用事焉由西廡循山逕觀龍  
見壇其旁卽禹穴乃大石中斷成罅殊不古殆非司  
馬子長所探也又數步飛來石老木搓牙石壁如削

綠磴道至錢秀才庵遂自東廡出院復登舟徑鑑湖  
湖天夕照水村漁屋皆被光景日所入諸峯俱在全  
霧中天下絕境也暮泊先以觀宿于明遠堂下小室



吳郡諸山錄

宋 周必大

乾道丁亥五月戊戌朔乙巳午後至滄市登法華菴  
望陽山在數里間其下有澄照寺今爲朱諤右丞功  
德院其旁龍母廟頗靈異晚抵平江入閶門泊北寺  
尋徙承天能仁寺觀銅佛圖經云梁陸僧瓚舍宅爲  
寺中有聖姑廟蓋陸氏女今號惠感夫人郡人祈子  
頗驗頃之章濟之運幹來同過從母宅章氏甥楊昉  
明叔同宿丙午唐致遠判院來友之婿也丁未赴范



至能吏部會巳酉早同濟之民叔致遠游虎丘圖經  
云山在長洲縣西北九里一名海湧山上有雲巖寺  
眞娘墓劔池飯罷謁陳省華王禹偁葉參蔣堂畫像  
歷東西菴歸過半塘寺朱長文續圖經云虎丘寺卽  
晉東亭獻穆公王珣及其弟珉之宅寺前有高僧竺  
道講堂生公立片石以作聽徒折松枝而爲談柄其  
虎跑泉陸羽井見存壬子獨游北禪主者惠深住數  
十年一力新之十六觀甚嚴潔圖經本戴顓宅甲寅  
赴張漢卿會約爲天池之游乙卯早別從母登舟同

濟之至崇眞宮相別於閭門范至能顏休文相別於  
門外致遠聯舟繞城望姑蘇館而過八里至橫塘入  
般若寺又數里至黃山入法雲寺陳國長公主及石  
駙馬葬堂上寺之軒窗皆可眺望登塔一級以窄峻  
而止諸峯高下相連如筆格俗號筆格山又數里過  
木瀆鎮遂至靈巖廨院村民磔蝦蟆可閱以錢二千  
市千二百縱之呼荀輿上山山半有憇亭由支徑訪  
西施洞今爲石龕塑佛像回視已見太湖按吳越僧  
智賢乾德三年所作智積記云圖志言闔閭城西硯



石山高三百六十丈在吳縣西三十里闔閭置宮苑  
琴臺響屨廊館娃宮復有硯池翫花池明月池山前  
十里採香徑梁天監二年置寺十五年有僧自畫梵  
相於佛殿壁間後有西天僧見之云此智積菩薩也  
舊號靈巖秀峯院今韓世忠請爲功德院長老喜鄉  
來迂同自響屨廊過草堂上琴臺下視川原華麗太  
湖數百里在眼中致遠置酒勝集堂傍有圓照禪師  
塔塔臨石池卽硯池也故此山號硯石山近地別有  
磯村其石可作硯及器用堂上望湖邊兩山相對東

曰胥山西曰香山其中曰胥口故老言香山產香堂  
下平田之中有徑直達山頭西施自此採香故一名  
採香亦云箭徑言其直也或云由此投伍員尸故有  
胥山胥口之名香山西北連穹窿山湖中山之大者  
有東西二山皆號洞庭山餘多島嶼云夜待月望湖  
光然後就枕頃年嘗同章茂之兄弟劇飲於草堂濯  
足偃松間中夜方寢今日之樂又過昔游所惜偃松  
一枝已瘁至能走价送薰香松黃新茶其簡云來日  
登天平須攀援至遠公亭及諸石屏處白雲泉名在



水晶其色凝白蓋乳泉也張又新以虎丘石井松江  
在第三第六而下此泉未知如何試一別之向壽老  
欲作亭泉上及別築遠公亭而范氏媪居寺中擾之  
遂退寺右上山路旁有石龜形極似向亦有名近無  
知者忠烈廟具有文正以下畫像宜掛壁謁之丙辰  
早以香茶供智積殿周行寺宇惟倦於登塔塔乃吳  
越平江節度使孫承佑爲光國妃所造成於太平興  
國二年丁丑歲猶未納土今一百九十一年矣卿老  
具飯人力輩能鼓笛用徑山例呼而奏之登諸天閣

烹至能雪液步至後門觀大井其徑丈餘正東望崑  
山縣百里皆平田惟一山突起蓋縣郭之馬鞍山山  
寺在焉東北連山甚長常熟縣之虞山也自此升小  
車過天平下嶺甚峻約數里至白雲寺圖經云唐寶  
歷二年置在縣西南二十五里本遠錄公道場今爲  
范文正公功德院義倉在其中文正父祖塋山下故  
范氏多寓傍近或居寺廊不振寺有白樂天蘇子美  
王君玉蔣希魯詩刻久闕主僧庶事不治欲同致遠  
登山而脚力頓疲頗難之然思至能簡中語恐遺恨



他年遂奮衣右轉而上酌白雲泉甚白而甘躡石磴至卓筆峯高數丈截然立雙石之上附着甚隸晚疑其將墜餘如屏如轟或挿或倚備極奇怪行十六七里石愈衆而力愈憊廼循左徑訪石屋三面壁立覆以二大石少休其中下至小石屋一石覆之又下至飛來峯高二丈上銳下侈微附磬石前臨崖谷茲其異也又東下遠公菴一名望湖臺正直寺後今廢又下至五丈石亦閣石上次至頭陀巖有蓋斜蔽之次至龜石脊勢隱起名不虛得此山大抵皆石也壞形

詭狀可喜可愕今日適疲紉又當暑不能窮其巔然郡人能至予之所至者寡矣况游客乎歸寺欲拜文正及四子像坐待魚鑰移時乃至明日蓋文正忌辰云寺右有明因塔院詰曲隨山殊迫窄初僧智華與蔡京善政和間爲乞此額且立碑焉茶罷卽行過晨臺山大石特立進至羊腸嶺道旁有曾收和甫墓碑未百年已荒敗又度賀家嶺大石如橫案上立兩石俗云嶺北有新婦石此其箱篋也午飯王份知縣墳菴未時至張漢卿天池庵漢卿相待久矣按圖經吳



縣西六十里曰華山由絕頂而上有大池晉太康中嘗產千葉蓮花今池在山半未知是否漢卿於此營墓就隱負崖爲屋鑿徑穿洞流水四達其間種梅藝菊以待游人費蓋不貲然山石粗曠殊乏秀潤晚置酒更好亭亭在池上酒闌肩輿過燕窠山觀魏氏山地入魏奉議志菴右過北峯禪院其實魏侍郎憲之菴規模倣寺額而爲移廢額於此入門久之僧方出歸宿天池丁巳早飯罷同漢卿致遠行三里至張唐卿排岸菴後大石間有輓雲亭皆人力也自此度

廟嶺並花山凡數里至朱右丞諤永慕菴瑩域頗侈蓋蔡京當國與諤善勅塋故也又數里至陽山下望田間一辟邪甚古不知何人墳耕夫云近之輒有蜂螫人陽山吳郡之主山也有元居實者紹興間掌市骨董於樵場坐致高貲今爲平江總管陽山旣橫鷺乃大興土工築支隴爲生墳其傍起家舍雖溷軒亦極甃砌之工門外栽花木約數千株不知糜金錢幾萬緡又二三里度老鼠嶺入張齊賢承節菴與漢卿小飲而別致遠扣魏迥功菴過黃峴嶺遂至白馬澗



舟人已來與致遠酌一盃各解維去吳郡惟城西多山起黃山盡陽山兩日幾遍歷夜宿望亭

乾道壬辰二月乙卯予任權禮部侍郎兼侍講直學士院因修國史實錄院修撰坐不草新除簽書樞密張說王之奇不允詔與在外宮觀戊午早冒雨行十餘里至桐扣行四里許至佛日山淨慧禪院晉臨平岸崩得石鼓張華以蜀中桐材刻爲魚形扣之響聞數里卽此地近世訛爲同口寺不經兵火面對黃鶴峯有清冷一擊等軒庫堂後有池池中有渥洼泉出

石罅中東坡常題五絕句所謂東麓雲根露角牙細泉咽咽走金沙不堪土肉藏山骨未放蒼龍浴渥洼是也齋罷復登舟晚宿臨平辛酉早行至本覺寺登岸觀覽卽古攜李也舊號小長蘆東坡元祐間帥杭徃復過此爲文長老賦詩二首舊聞巴叟卧荒村來打三更月下門前詩也三過門間老病死一彈指頃去來今後詩也予癸酉冬來遊見池中大魚數千昨昨有聲今亡矣癸亥至吳江甲子從王季海提刑別借舟就驛中治疊行李蓋去國匆匆殊無倫理也浴



院在驛旁有建隆初吳江西城鎮邊使徐某乞置無  
碍浴院狀錢鏐判任者二字用天下兵馬大元帥府  
印寺僧寶藏又有治平四年蘇州牒皆用短少紙古  
人不侈費類此戊辰出吳江界三月己巳朔風順俄  
頃至尹山以小舫入崇福寺同主僧惟妙訪何氏園  
亭園池雖狹種植甚繁海棠盛開聞牡丹多佳品少  
休還舟中繞城抵盤門易舟徑赴范至能石湖之招  
過橫塘即賀方回所謂波陵不過者入般若院長老祖康蜀中士  
族也風橫而逆薄莫方至初吳王築姑蘇前後兩臺

相距半里

俗呼拜郊壇

為城三重遺基儼然夫差與西施

宴游之地也前有溪越王勾踐由此攻吳今號越來  
溪溪上築城與吳人夾溪相持至能之園因城基高  
下而為臺榭所植多名花別築農圃堂對楞伽山臨  
石湖蓋太湖之派范蠡所泛之五湖者望吳江縣纔  
二三十里飲酒至夜分留題壁間云吳臺越壘距盤  
門纔十里而陸沉於荒煙野草者千七百年紫微舍  
人始創別墅登臨得要甲于東南豈鴟夷子成功於  
此扁舟去之天闕絕景須苗裔之賢者然後享其樂



耶乾道壬辰三月上巳東里周某子克侍家兄子上  
來游紫微方腰桂林組過家寔爲東道主云庚午登  
舟辛未至靈巖山癸酉陰肩輿二里觀金沙塔其地  
有金屑雜沙中丁亥歲所未至也甲戌清明節早濃  
霧旣開湖山競秀方快心目俄而大風同大兄至延  
壽堂再游本禪師塔過偃松堂登琴臺望崑山慧聚  
寺風動地幾不能立北峯長老師璨相候乙亥輿大  
兄肩輿數里至天平長老欲謁五范畫像而童行持  
鑰匙出復行數里過天峯禪院俗呼南峯蓋支遁道

林別庵也鐵杖重十餘斤云是當時物佛殿前有碧  
琳泉寺宇頗佳多葉少蘊詩刻門外百餘步有道林  
放鶴亭基進度石門有馬蹄雙跡其旁卽石室嘗爲  
孕婦所觸雷震其頂相傳云道林夏居別峯冬居石  
室別峯卽南峯石室卽此室也又有中峯不暇往焉  
跡去石室甚近爲觀音院僧限以籬落紆曲半里乃  
能至焉觀音院方修葺無足觀由南峯又數里乃至  
天池庵置酒池上觀競渡池心有橋可以徙倚晚策  
杖登月觀下視空濶蓋華山之顛也丙子至北峯赴



璨老飯遂過元氏菴距天池十里丁丑復還靈巖初  
過王知縣墳庵次度賀家嶺又數里登靈巖後嶺下  
視砥村乃鑿石爲器之所地本土山掘之卽石云遠  
望嶺上積土如塚墓者甚多相傳吳時伏兵其中未  
知信否過金沙塔乃至寺自天池來約十里與卿老登水陸  
堂臨池散餅餌候金銀魚久之不出夜同卿老坐勝  
集堂望湖賞月遂訪明月池乃在柴塲中殊不治戊  
寅早中車游穹窿約八九里入山口卽行石衢夾道  
多丘墓有富人余佐監簿覺華菴雅潔而閣深軒窻

間海棠盛開極可人又二三里乃至福臻禪院古碑  
云朱買臣捨宅爲之殆不可信或曰吳越忠懿王時  
德韶國師道塲也因山壘基甃壁十餘重登陟雖勞  
而氣象淳古大兄謂甚類南嶽諸寺元豐八年七月  
米元章和仲殊詩親題壁間方丈後有法雨泉葉少  
蘊爲之銘又其上有韶師石室雷雨作不果登時諸  
僧皆出匆匆下山避雨於林奉直振白雲菴稍雨霽  
遂歸中道復雨衣履盡濕至砥村靈巖遣人來迂已  
卯欲游杭塢雨大作而止辛巳同卿老下山行二里



觀韓王墳欲歸登舟過寶華而天氣晴和忽有游杭  
塢之興遂與大兄呼車往焉約十里度小峴嶺入唐

子明侍郎墳庵又二三里至白馬穹窿禪寺

景德寺碑云

南梁天監中取梅梁於此因白馬之奠而得唐會昌六年置禪寺飯訖行數里至墅

里又數里過支塢嶺遂至法華院本皆荒山中官利

州觀察使李中立造塋於此捐家貲數千萬創精舍

十年而成四山環抱宛若化城三門為閣七間華麗

擬宮闕其間棟宇甃砌種植皆稱是門外數百步即

太湖極目彌天之浸裴徊不忍去飯茶於塔院登候

李之丘讀孫仲益所著銘主僧具飯投客館壬午發

杭塢約十里入寶相寺風雨交作行近一里至梅舍

訪鄉人張氏運屬公之子德遜置酒留宿癸未晴德

遜留再飲而別出門僅半里即太湖近岸水纔三四

尺稍深者丈餘聞湖心苦不深但水聚而渺瀰耳登

舟值西風揚颿極駛望洞庭諸山恨不一往移刻入

胥口遂至木瀆平生未有如是之快也行李船尚在

靈巖之下即往就之至圓通菴再約范至能會石湖

復掛帆而東及園至能未來梨花金林擒緋碧桃盛



開與伯氏徧賞遂游楞伽治平寺主僧房有日觀稍佳門外八角大井視石欄刻字云隋開皇十年楊素開素初平陳徙吳郡於此近地尚有新郭之名其後吳人不安之復還今城云薄晚至能來望夜月色如晝乘小舟入石湖之心風露浩然登岸杖策度行春橋石橋極壯大次度越來溪橋新修歸飯煙波亭飲農圃堂此飲此樂未易得也夜分乃寢甲申大風至能具飯訖同跨馬游橫山寶積寺寺亦唐餘本朝祥符中額聞丁謂當國念其貧故畀此名有五代時吳越

國碑稱寶大二年亦足證錢氏嘗改元矣寺旁乃唐致遠先隴五代以來接續葬一山平江世家惟此爲久次登上方敎院在山之巔卽楞伽塔也望太湖瀰漫石湖僅如斷港有隋大業四年碑字畫類虞書小酌御風而下回望姑蘇前堂周遭城基故在至能畏風不果登登後臺而歸二臺相距甚近但隔楞伽治平寺至能辭還城復侍大兄絕湖入境約十五里游寶華寺未至二里捨舟而徒及門已暮夜宿焉去靈巖止十餘里乙酉早周覽寺宇修廊華屋吳中之名



刹按碑志本梁天監中西成僧緬和尙卓錫出泉  
今在寺左百步深纔數尺大旱不竭寺高泉低為石  
槽仰而注之僧有衆寡恃以給用齋前流多齋後差  
少茲其異也舊號知顯寺紹聖四年樞密林希請為  
功德寺遂加慈嚴之額林氏墳在寺後數十步又數  
十步即葉清臣內翰墓夢得左丞之母亦葬此飯罷  
命車登堯峯中道有半峯亭蔣堂賦詩今廢雍熙二  
年巳酉大理評事知縣事羅處約記云昔在帝唐以  
洪水肆暴吳人族遁於此俗呼免水鼎蘇帥錢傳瓊

易名堯峯唐天復以後有僧惠齊姓朱氏郡人也結

精舍於此山下名魯塢山蔣堂所居既死葬焉此寺

乃奉其香火蔣之奇壬子歲留題數百字尚可辨寺

有清輝軒碧玉沼寺左觀音巖石象佳白龍洞俗云通洞

庭多景巖寶雲井井在寺左山頂人以爲難皇祐四年長老顯暹所鑿蔣堂有詩偃

蓋松二鐵塔妙高峯下視空曠東齋敞甚晚同長老

了念徧覽畢由龍洞觀音巖而下蓋寺後路也復至

寶華飯寶林軒修竹叅天極可人飯罷登車行二里

至環谷乃王珏總領之居園亭池沼花竹奇石環繞



其屋珏字德全介甫之後乾道元年年五十三失明  
罷歸相者告以其亭某所而已珏不見也又里餘復  
登舟觀吳王魚城城在田間當時養魚於此基厚而  
方其高二丈博倍之中爲田百二十畝今屬練墟趙  
氏土極細故久而不壞欲訪顧野王墓不果遂自石  
湖入少府港歸盤門舟中已昏暮自寶華至此三十  
餘里丙戌黎明別大兄過崑山丁亥夜抵崑山丙申  
挈家登舟隨潮宿怡亭丁酉早過閘門與大兄同游  
虎丘夜宿寺里長老希範戊戌登觀音殿几案四壁

皆石也觀試劍石憨憨泉點頭石晚移舟過楓橋四  
月巳亥朔外姑仲賢置酒爲餞壬寅次無錫癸卯次  
常州訪周德友運幹其子輝示近作一卷乙巳以小  
舟挈家趨宜興巳酉同大兄至臺莊祭外氏墳甲寅  
挈家登舟過溧陽縣三里宿乙卯行七十里至三塔  
院院在水中有元豐中劉誼所作記三塔者相傳僧  
伽過江造塔至此爲第三耳寺宇弊甚有寒光亭可  
望湖二三年來亦廢又三十里至鄧步

隸溧水縣

有數十

家及稅場又十里至東埧亦數十家丙辰雨意甚濃



時時洒塵程泰之運使先諭溧水宰備車乘相待治  
疊移時乃登陸天氣稍霽行十五里至銀樹亦有一  
二百家  
若水泛則自  
此便通舟又六七里至雙港口復登舟約十餘里  
至固城湖日猶未晡蓋數百家之聚也登妙知庵晚  
與庵僧散步固城之上父老謂之楚王城其周數里  
地勢甚高丁巳同大兄肩輿五六里至禪林山惠照  
院啓天申節寺僧云相去二十里有游子山儒童院  
蓋夫子游學之地不記圖志所載云何歸舟解維度  
湖水纔數尺然亦瀰漫其中多菱葑凡三十里至石

橋頭入溪港

地名石橋  
而無橋

約五十里至太平州河口兩

岸多民居溪流不甚濶煙樹如畫稍前即永豐圩八

四圩  
共之夜泊黃池鎮距固城湖已百一十里而商賈輻

奏市井繁盛俗諺有三不如謂太平州不如蕪湖不

如黃池也巳未至小漳淮登岸入棲隱寺弊陋無足

觀又十里至郭城登普化寺遣人先往隱靜借人輜

遂自別港約行二十里泊新林小商十數皆以船為

家登岸三里至小市有民居酒坊及韋察院祠守者

云興於後唐同光中庚申早隱靜人至挈家行十里



至寺五峯不高而形勢環抱本梁朝杯渡禪師道場  
禪師謚慧嚴寺名普惠邃廊傑閣江東之巨刹隸太  
平州繁昌縣寺後三百步碧霄峯下有泉出石中流  
入寺瀨瀨有聲且給烹煮灌溉長老行機台州人頗  
為僧徒所推有衆三百飯罷淪茗泉上聞登山則見  
巖洞之勝初暑不果往歸寺登禪傳閣徧歷寮舍再  
飯訖出寺觀卓錫泉夾道林中王孫纍纍然行近里  
許至夢堂前上藍長老彥岑在焉又半里至杯渡塔  
乃升車由南陵路行十里落路過趙家步已見星矣

早來先移舟於此辛酉舟行十餘里近南陵縣午時  
挈家入行衙為遵陸計壬戌風雨顧夫亦未齊為留  
一日縣西二十里有工山遠秀拔縣南六十里有呂  
山圖經云孔聖曾游置書堂於此見有石室其山南  
石縫內泉水湧出流於漳淮去縣三十五里曰孔村  
村落路五里至石室癸  
亥早飯敬亭山去縣三十里山在宣城而名在此當考過  
孔村土人無此姓聞  
專以夫子得名晚宿隔口何氏酒坊去縣六里甲  
子早行十五里路旁有泉甚清尋伏流而去次至燕  
兒磯上山數十步有石洞刻云劉公巖又二十里飯



水瓜塘徐家店又十五里見游人來者憧憧問之云  
半月來樵夫新得一洞深數十丈其大如數間屋有  
石鐘等而近時人皆不知惜乎行李已過不及一游  
晚至青陽望九華如見故人館於妙音禪院乙丑早  
發青陽二十里至長橋回望九華甚奇路旁復有泉  
自山石中出飯葉氏新店卽鐵券路口去縣已三十  
五里至齊山從者告疲携家入寺登覽投宿寺中主  
僧智瑞丙寅早入城館司戶廨中報謁程倅同登拱  
翠亭望溪山李庚子長改其名曰如剡蓋用李太白

秋浦歌云江山如剡縣風日似長沙也又登九華樓  
蓋城東門也丁卯張知彥胡宣叔共置酒常平司初  
食鱒魚是日大兄獨游雲光寺江祖石戊辰早發池  
陽飯十八里店又十二里過紫巖民居稍衆卽產紙  
之地有紫巖大王廟又十五里至柯村東流縣境也  
凡三十里乃入建德縣界五月巳巳朔早行二十里  
過白面渡又十餘里飯烏楓潭又四十里宿藍橋張  
氏庚午早行二十里飯石潭稍前有仙女井撫掌則  
虜沸俗云仙女喜也按圖經去縣三十五里留山頂



有葛仙壇相傳葛真人煉丹得道今丹井尚存而好事者因有藍橋遂傳雲英事自石潭四十里至建德縣館於行衙其前石山蒼翠謂之後山以縣治正倚此山故也山頂有朝峯亭梅聖俞作宰時常賦詩今廢又有蛻龍巖晚同大兄散步山下有青山文殊東庵三僧院相連接皆無足觀辛未早行三里過堯城渡方輿記云堯南巡至此又縣北二十里櫟山下有舜城古老云舜南巡至此又縣北六里斷崖石壁之上有印文圓如馬蹄兩兩相對圖經云許旌陽逐蛟

至此所留也邑官送別二十里地飯三十里之楓門嶺晚宿遶山去縣已七十五里地壬申晡時抵石門市爲鄱陽西尉治所乙亥早發石門游道傍南臺院破斂無足觀又二十里飯車陂又三十里過童子渡相望有小山俗號童子塚其說謂九女溺死甚不經又二十里宿觀岡丙子早行二十里飯三口又二十里有居民百餘家謂之四十里店又二十五里落路過薦福禪寺避入城人事之勞也寺蓋古刹所謂轟碑者其前卽東湖方丈後大竹中有青亭甚佳丁丑



晚登舟壬午至餘干江口距邑尚十五里自此順流而下溪水瀰浸田野皆爲陂池癸未黎明至鄔子寨入湖巨漫稽天非丙戌經從之比未後將入港湍流不可泝復行石礫湖約二十里穿小竇達于港繫舟蘆間四無人煙彌望皆水是日過湖畧無風濤有小蛇昂首引舟抵岸乃回戲作小詩云萬頃湖光似鏡平蜿蜒遂得導舟行從來仕路風波惡却是江山不世情乙酉風雨不止水益漲入池口趨寂照院僧言院興於天祐十五年戊寅舊名資福仁宗治平中改

今名丁亥風稍定解舟行數里望大門院在水中棹小舟往游至則破敝將傾一僧出門隔淺水遙語而回稍前涉高機湖菰蘆之場皆爲水沒野鼠無數被浸灌依聚沫而立晚泊徐汊龔帥差小舟來戊子捨鄱陽之舟以小艇乘順風而行晚泊龍沙章江禪院挈家投宿己丑飯罷挈家游秋平酌淺沙泉遂過列岫亭入報恩禪院長老曉林眉山人藏後有鐵文殊像甚大歸入景德禪院觀銅佛鍾傳所鑄也登閣閑望庚寅移舟滕王閣下挈家屬寓閣上如遷喬木也



丙申大兄先乘舟歸廬陵六月戊戌朔巳亥舟行泊  
蔣家灣庚子早行十里過生米鎮又二十餘里泊曲  
尺湖辛丑行二十里至市汊又十里泊稗堆步相對  
卽龍霧州癸卯至豐城甲辰早行縣官送別李家坪  
距樟鎮十餘里宿乙巳夜至臨江軍戊申早移舟慧  
力寺下携家少休江月亭午後解去晚宿永泰寺巳  
酉宿青泥庚戌早至神頭之龍安寺辛亥早移舟入  
邑壬子早過江癸丑早發新淦甲寅晚宿硤江灘下  
乙卯晚宿敖山丙辰晚至元潭登觀觀古劔其長尺

餘頃之拋江復行數里丁巳抵白沙戊午至吉水縣  
哺後解去北風微作猶移時方能上滑石灘宿墨潭  
庚申早挈家入宅



廬山錄

宋 周必大

丁亥三月乙巳過隆興府丙午晚泊吳城山下廟登  
望湖亭春水未生涯渚歷歷丁未舟人賽廟畢解去  
自此入湖掠珠溪神岡左里廟皆不泊湖中多沙山  
望之如雲廬阜青蒼真欲招隱耶未後次南康軍僉  
判趙無悔相訪別適周歲矣借虞兵陳宣前導出西  
門諸峯橫陳瀑布中瀉寒食節遊人布路約十餘里  
至開先寺長老不在同西堂元湛上漱玉亭觀石柱



間東坡辛巳四月題名開先舊屋惟有此亭其上卽  
石橋又其上瀑布落焉瀦爲龍潭旱歲祈禱頗應回  
觀僧堂卽南唐元宗少年書堂也古碑一空魯直院  
記偶存耳寺之東山別有小瀑號馬尾泉其餘境物  
之勝僧徒皆不能言要當按陳令舉之記以浹旬搜  
訪或可得其四五耳飯罷日已落急命車南訪歸宗  
寺由簡寂觀路口以迂僻不果入行官道約十里將  
至寺先渡鸞溪橋酌一滴泉躡支徑過水磴循溪源  
有大池縱廣十丈甃護皆以石又其上則石鏡溪聞

刻魯直三大字曠黑不能視獨題歲月於王龜齡待  
制詩牌後溪上直紫霄峯鐵塔在焉村民以二三月  
二往採茶約十里云自此卽架石渠導水長至二百  
丈最爲奇特此外舊物稀矣秉燭入寺寺在金輪峯  
上霄峯之下上霄者秦皇漢武帝所登也長老名僧  
縱闔人同謁王右軍塑像觀墨池又有鵝池恐僞南  
山至此已十八九尚有康王觀谷簾泉在一二十里  
間遂轉山北入江州界矣隔路別峯號黃龍是爲湯  
泉有寺幾廢云縱作果供二鼓就寢今日之游雖匆



匆而藍輿中遍觀山面所得爲多恨不能詩以識之  
戊申聞五更鐘卽蓐食以火炬夾軍而歸初甚雨無  
從假蓋已而稍止至萬杉院天始明頃經焚蕩尤貧  
乏同長老上散珠亭卽舊滴翠亭也雨復作亟過棲  
賢路稍崎嶇然不妨觀山也約十餘里至三峽橋蘓  
黃門所記殆非誇詞恨不遇積雨怒漲時耳下觀橋  
柱余靖元絳皆刻姓名自此行石衢至玉淵亭澗水  
披石陡落滙爲龍湫雪濺雷吼不減三峽又數十步  
乃至寺山林陰翳棟宇零落如蹈無人之境升其堂

一老妙徽方出嘉州人也同至五老亭古碑多燼於  
火而祖無擇愛堂銘獨存堂今在菜圃後僅存階梯  
按記文唐寶歷初李渤捨宅爲寺云聞數里間有楞  
伽折桂諸小院乃舊屋楞伽卽李常公擇山房有其  
妹墨竹迫歸不能往出棲賢行十里得官道入羅漢  
院雖免火厄而王者非其人坐觀摧敗略不支補惟  
藏殿尚如舊內外皆石柱刻龍遶之承平時民財旣  
富濟以國力固應如此又十里入北門江行圖欲登  
落星寺而泉客在岸應酬移時日已過未遂解去晚



泊女兒港已酉早昏霧辰後方解而北風作過大孤  
泊黃泥汊風止遇泊樟汊口頃之風稍息行數里浪  
勢未平家人輩驚怖復掛颿回漳汊昨日若遇此天  
氣則少留落星再遊廬山矣

廬山後錄

宋 周必大

十月乙未朔壬子次南康軍水殊未落入泊寨中癸  
丑欲游廬山值大雨乙卯拂旦出西門過開先路口  
數里由別徑入簡寂觀宋陸靜修故居也其旁有嶽  
廟守者云先生煉丹井已過回步訪之深三尺在田  
間酌訖乃至觀中陳賢良記云觀在白雲峯下其間  
一峯獨秀曰紫霄其北又有屏風山其前一里有雞  
籠山觀門有朝真閣今廢殿前有先生醮石亦名禮斗



石道藏石刻銅天尊像石磬白雲樓西澗懸瀑落於  
廡前甜苦笋間歲一生相傳先生手種者邂逅章績  
與之同過度仙橋記云許堅聯衣石澗中間道士則  
云沙石湮埋久矣進觀連理樹次至先天觀次至祥  
符觀舊名靈溪記云三武士嘗棲溪側漢武賜名齊  
朝修創南唐重修今石衢甚廣而屋宇極不振自此  
數百步卽歸宗禪寺樅老來迎飯而後行道中有三  
將軍別祠卽所謂三武士其名曰唐建威李德及宋  
刁雲正廟自歸宗登山纔里餘又其上八里則紫霄

峯峯頂有鐵浮圖九級藏舍利遠望如枯木而晉梵  
僧耶舍亦有墳在其衢又三里有謝景先草堂乃杏  
林故地天氣未佳且無向導不果徧游杏林者後漢  
董奉活人疾不取貲使愈者人植杏五株然奉自有  
太乙觀在山北或曰杏林在此而上昇太乙觀耳記  
又言歸宗後峯半右石室中有夏禹刻字僅百餘人  
無復至者過歸宗望紫霄峯亦有瀑布行官道約三  
里入小路訪栗里求醉石土人直云此去有陶公無  
栗里也屈曲行三里遇數道人草菴背有岷古潤醉



石在焉仰視飛瀑披大石而下甚爲奇觀石有均處俗云陶公枕痕也又指若虎跡者其說尤荒唐嘗記前人題詩云五字高吟酒一瓢廬山千古想風標至今門外青青柳不爲東風肯折腰惜乎不記其姓名餘具記中久之復出官道訪謝康樂經臺或云地屬皇甫道人已焚之矣次至黃龍靈湯院敗落特甚而湯泉固自若或題東坡和可遵絕句于壁間又十五里落路數百步至康王景德觀對天柱峯倚凌雲峯兵火後殊草創其西有四庵一院相去不遠而記中

無所取故不往夜宿山月軒下臨大溪簾水所注也

終夜如大風聲丙辰早同道士喬大和渡溪入谷五

里至舊觀基

記云隋開皇徙

今爲菜圃又半里至龍泉院破

屋數間而已又十里至董氏茅屋蔬食畢望簾而進

此陸羽茶經第一水也熙寧元年七月夏倚所記信

而有徵言過石磴路甚危蓋鳥道緣崖其下卽澗壑

又草木蒙密須盡芟去乃能徐步耳倚所謂平石可

坐數人者正與簾對過此則大石散亂不可行予跳

躍其間從者皆驚逼簾濺沫噴人如霧雨毛髮凜然



水初束於石硤勢猶未廣既而散布傾瀉雖冬深水縮猶為十餘派聞山後乃開先路豈非與山半之瀑同源耶谷中若用兩壯士挾山轎則可代步然屢涉溪流春夏漲溢亦未易進也今日予皆徒行幸天氣晴和歸路方有微雨回至山月軒道士喬大和猶未飯且言嘗有雪覆谷中不知也去觀五里至荆林寺是為山北江州境大風人不能立晡時至侯溪市入圓通崇勝禪院古有侯氏故以名溪長老不在首座祖勝潼川人可與語同過旻古佛塔謁西堂修誼故

人惟訥之兄也東塔廣福院相去二里寒甚不可往

步至磨院風益甚或云寺前山中有風穴故多風飯

罷登至樂亭在法堂后觀李後主及昭惠后畫像訪清音

亭兵火後偶餘此亭乃摧壞弗葺惟石渠二百五十

丈尚無恙夜宿寺中丁巳早謁圓通殿舊但樟木觀音今亡乃設

釋迦觀音文殊三像於中而環以二十五圓通會食於東軒出門望馬耳石

耳峯方出昨夜疑大雪今日天氣乃稍開晴過甘泉

市至七里畧落路飯廣福庵庵泉水即石門澗也同

主僧慧辨行百餘步訪尊勝庵下有石高數丈長



廬山後錄  
如之中若剝裁可過二三人謂之石門相傳古有僧  
誦尊勝呪而石開遂以名庵庵對仙步峯又數十步  
至保寧庵三面皆出其南石旌峯在焉此三庵皆沿  
石門澗激水碓茶資其利次度橋上雙龍庵雙龍謂  
錦綉澗及庵傍小澗過此直上天池凡十五里或云  
兩旁通謂之綿綉谷蓋春時山花盛開望之如綿綉  
云山路峻甚每三四里輒爲亭以憇凡五亭第一亭  
跨澗頗雄偉行至半山有處州道人草庵在綿綉峯  
下指其旁以爲竹林隱寺游人或聞鐘鼓聲按山記

云香像出北名阿那衡內有寺暮時聞鐘梵而寺隱

不見其旁半里有羅漢巖亦阿那寺之類而近世誤

謂之竹林耳

山南真有竹林寺

由道人庵而上路愈岐每數

十步卽回視江淮無遁形者過第四亭有大石凌虛

而出可坐數十人百千里畧無障蔽

俗呼四望石以山記攷之亦非

是平視一峯上有巧石

俗呼香爐峯以山記攷之乃在東林化成路

亭午

至天池禪院雖鑿二沼其澗可待所謂天池今不可  
到號曰龍潭在鐵船峯下亦有黑龍潭祈雨則至焉  
長老不在同首坐道微登文殊亭下視鐵船峯望石



門澗自山委蛇而出直達於江然則尊勝庵之石門  
非水源矣院有崇寧間西天僧金總持像及貝多葉  
梵書數十辟支佛牙觀畢回道徹謁隆禪師塔其旁  
卽定心石也記中下有望仙臺道徹指其前一峯爲十八賢  
臺未知是否新羅巖草深路迷不能至歸院日方斜  
復度嶺行二里許至王鐘塔洞視空澗又非第四亭  
而上可比東西二林歷歷在門而江州屋壁已可辨  
有九十九峯櫛比磬折如城堞然王韶觀文葬其下  
此登眺最佳處也稍前至佛手巖雪花滿樹庵門尚

閉乃知昨日大雪今日驟霽望南山雪氣猶未散賦  
小詩云十月頑陰不見山山中一夜雪封庵伊予的  
有尋仙分日照北山雲在南聞每歲自九月便有雪  
至三四月乃消去巖石空洞不止容百人下有泉水  
道徹云巖上立峯如指故號佛手近爲野火焚裂矣  
緣巖後細路數百步東望一峯卽舊峯頂院今廢或  
云其間方是錦綉谷達於平田又下視磐石相傳遠  
公講經臺也自佛手巖一二里渡小溪乃至大林寺  
遭野火僅有基址其額爲教練者徙真墳菴併令一



僧據其田人無知者予按白樂天詩心實慕之物色  
乃能至其旁小徑卽下山南棲賢路也地在山頂而  
反平衍謝靈運詩云冬夏共霜雪其高可知予作弔  
大林詩云上盡諸峯地轉平天低雲近日多陰古來  
南北通雙徑此去東西啟二林虞世南碑從泯沒白  
居易序合推尋康廬第一金仙境忍使如今遂陸沉  
黃昏歸至天池禮文殊求燈閃爍合離或在淮南或  
在近嶺高者天半低者掠地又賦小詩云代馬腥膻  
暗五臺南方世界且裴回傳燈便是真知識不用辨

波學善才是日雲散日出寒燠適中甚愜素志山中

薯預花全類蝴蝶又有萬年松羅漢線菩薩石

卽記中所

謂白石英也

戊午早同道徹望羅漢巖卽下山山上微雪

山半乃爲雨矣由石門澗出官路稍前卽岳家市

卽飛

葬母於此故爲市

自此可上化成不惟足力有限又山記止

言石盤之美而樓閣已非昔遙睇而去回視文殊亭

渺在峯頂主簿塔僅如枯木佛手巖呈彷彿可辨始

嘆昨日登涉之不易也午時至林口寺

謂二林之口

過杏

谷慧永禪師塔入西林寺卽慧永道場也流水瀼瀼



循堦除賞翫不能去寺不經火但不葺耳牛僧孺書

寺額佛像獨被冠纓訪水閣院已廢但存浮圖七級

次至東林晉慧遠法師道場法師鴈門人於是寺前

方輿鴈門市虎溪在寺門之外山記云清溪有亭今廢

牛僧孺太和四年書神運之殿今殿非其舊南唐元宗題

神運木今亡流泉匝寺下入虎溪殿後白蓮池晉輦或云

政和間太經藏院白公草堂雙玉澗明皇銅像今作傳大

守焚之士裝飾觀其豐唐壁畫等今亡上方舍利塔有南唐保大碑在門

顏魯公題名上方之外虎跑泉深入九尺五彩閣甘露

戒壇今亡其西石磴二百級岳飛母拆砌墳滴翠亭今殷仲堪

聰明泉佛影臺今亡晉朝三杉亦為岳飛取出是寺最為古刹

而兵火中巋然獨存入門樓閣華煥宛如仙宮長老

本然自號混融師宦族也其飯畢同訪遠公塔次至

照覺佛海二塔歸登五伯羅漢閣望諸峯閣下即內

三門也出東林二里至廣福院本大明公廟保大五年陳元

裕撰靖國元年封清公真人記云真人姓匡名續字

君孝出自殷周之際居此山或云受道於仙人共游

此山人謂其所止為神仙之廬因以名山或云匡裕



漢人漢初封越廬君故曰廬山次至太平興國宮街  
衢門闕氣象清華劉越石高三四尺根植地中在宮  
門之外仙鄉亭廢矣宮倚聖治峯正殿惟設採訪使  
者像其後乃太上本命殿兩廊繪使者變相儀衛次  
以五百靈官又其後有雲無心堂臨流水可愛道士  
皆星居有劉烈者號虛谷先生嘗進易解云知宮留  
宿不果登新創鐘樓而行樓名景陽華麗殊甚日落  
至清虛道人皇甫坦庵飯罷館焉坦被遇太上結庵  
撥雲峯下自言兖州瑕丘人久在川陝嘗遇朱挑推

善布氣時時書字決人禍福或云年七十二山中道  
士言其顏貌已不逮二十年前矣近損足未能步而  
茅山張椿齡亦被遇太上今年亦得此疾異哉庵側  
有泉太上題曰神泉又爲閣以藏御書及像設已未  
早皇甫道人再具飯飯訖行數百步至雲溪庵  
也側近云有數  
廟聞不甚佳自此若出官道則過妙智院及蛇岬  
即郎亭湖  
風化身之地于欲趨太乙宮或謂小路差近乃過  
擊牛墩皆茅峽峻嶺亦六七里方至  
真宗賜名大  
中祥符觀即  
董奉上昇之地大槩二十一日已記之其事出葛洪



神仙傳觀在蓮花峯下不經兵火有昇元大年韓王知証記是時猶謂之廟保大十二年記則為觀矣宣和二年封奉為昇元真人觀中猶種杏前殿一株甚大其後又有種杏軒春時不妨宴游也先道士蕭惟憶年七十餘未嘗出門視其貌蓋有所養者自觀五里至禪智院對雙劍峯稍偏正對山之外白小石榴峯以其為舊屋故游焉記言院後有綠野亭忘記詢問進至雙溪寶嚴禪院再飯同長老世顯步過雲慶庵記言因流泉為池多畜魴鯉今僅存坳窪耳假世顯之驢令庵僧致康

前導過寶積庵殊不葺治但有程公闢師孟詩刻訪白雲亭已為王秀才治冢其上披荆棘尋所謂磐石鳴泉久之訪見泉石誠佳而又北望湓江宜陳舜俞以為山北最佳之菴此去江州纔二十餘里山北之境盡矣跨驢五里上吳章嶺亂石聳牙頗亦險峻嶺脊分江東西兩路界過界便見五老峯是為山南嶺下有小路至智林淨慧院昭德觀會日斜僕疲乃由官路過大富莊至相辭橋俗云蔡李二真人相別處也已昏黑秉燭行至尋真舖風大作入小路二三里敲觀門道士



疑為盜父之方出真誥言廬山乃元辰福地而此觀為第八詠真洞天五老峯正在其後而倚香爐峯

南北山各有香爐峯庚申登採訪使者閣望五老峯記言漢武

築羽章館於屏風壘下臨相思澗今五老之峯壘石如屏障蓋其故里自閣而望相去若在百步間廬阜之甲觀也為題其榜曰雲錦閣李太白屏風九疊雲錦張之句云五老第二峯即獅子峯與九疊屏相連山無草木曉日照之殆如赤城自廊廡望之則奇姿巧勢尤不可狀龍潭在觀後一里水作琉璃色其中

數尺正黑知觀湯善馴云深數十丈蓋洞天之門云潭上有龍王祠疑即記中所謂綠淨亭也已初借善翔小驢令四明徐道人前導過永福院舊名雲龍煨燼之餘方稍營葺次至壘石庵蓋近世僧德正所創門外大石長數丈復壘一石前眺江湖宛如池庵背即五老峯乃凡案間物陳舜俞所未見蓋後來庵宇之絕景也次度華嚴石橋華嚴院今廢次至折桂院今名證寂折桂因唐李逢吉得名記言山名幡竿源而土人不知登南唐惠濟禪師石塔有巢雲軒而記



廬山後錄  
不載不經兵火氣象便可愛前有僧房可望湖而不見山次至解空院其旁聖果院已廢次至谷源庵地形甚高面對重湖記言疊石奇偉豈謂德正之庵耶後有幽泉但屋弊無足觀者自此爲折桂小童指路迂枉忽下峻嶺木葉被霜滑汰幾不能移步至雲臺庵乃得平地庵後石崖如記中所載次至淨妙院記云古名青牛谷卽楊衡所謂隨雲步入者儼然如造仙境門外數十步回望五老及他山如圖畫凡此寺觀庵宇大抵環繞五老峯每至一處山色峯數輒不

同造物之無盡藏也獅子峯尤肖今日但少雲氣飾之次至承天白鶴觀唐混成先生劉玄和故居舊屋偶存獨無廊廡唐杉圍二丈在門內問東北木瓜庵道士不知觀前百餘步出官路過三峽橋遣從者先入棲賢獨與徐道人携二僕復由小路爲卧龍之游初過中興庵卽舊禪靜院次寶慶庵近各有一道人主西澗卽劉凝之庵無知者旣過澗徐道人迷路度峻嶺踰棧閣遇炭窰方知路穷得一夫引至上偃臺卽祖教院亦無僧行自此又盤一嶺至卧龍新庵有江州



蔡道人主之復行半里過舊菴基沿澗乃至其處蒼崖之下怒瀑淙擊高十餘丈與九華山雪潭爭爲長雄凡陳舜俞所記一無誇詞今日不憚崎嶇險阻凡以爲此未至而悔旣至則樂以忘勞焉舊庵隔溪巖石層出粲如百疊之雲中有流泉注于澗亦一佳處也望五老峯甚近香積院在其下業留從者於棲賢遂問歸路數里至出邃庵今爲尼居王者覺殊鄆人壁間舊刻馮宗詩蓋嘗讀書於此庵前度溪至上塔記所謂拭眼禪師石像如生者舊屋甚整潔大竹成

林酌飛錫泉登環翠閣望五老峯背自此下山數里卽至棲賢微老不在藏主可昇眉山人與予同庚爲占四韻云我比同年百不能只餘霜髮愧師兄殷勤覓句無言說共撥寒灰聽水聲寺比今春稍葺但殘僧四五輩不稱大刹飭罷同昇上人過五老玉淵二亭山水不辜老眼而足爾矣遣人至軍城招妻孥來早會此辛酉拂曉自寺後渡澗行里許過百藥灘石岸坡陀道人於此曬藥陟山嶺度茅垌約四五里並五老峯至明真尼院冰霜滿屨扣門久之方開蓋舊



屋也同尼師登凌霄巖巖在地奇石如巖古有僧坐  
禪其間繞洞別過石門謂之喝石其前一石甚大卽  
記中所謂對五老如賓客者傍有石屏亦可愛出門  
數十步望宮亭湖橫出而揚瀾左里左右相對落星  
僅如葉舟惟軍城爲紫荆山所蔽耳回過百藥灘分  
路行三四里入楞伽院亦古屋也正倚朱砂峯舊號  
白石佛殿創於保大中釋迦像與西林同李公擇尚  
書藏書閣在東偏元豐以後留題皆存有趙天啓者  
歷叙公擇作中丞救蔡確故改戶書云云西廡有東

坡作山房碑又刻南唐佛像野夫公擇及黃魯直皆  
有題字崇德君墨竹高下校在鐘閣蓋公擇妹魯直  
母也寺門外卽上天池大林路至爲險峻老僧惠寶  
生於元豐八年云自此別有捷徑約一二里過澗入  
棲賢磨院院在石人峯側又里許遂至棲賢骨肉方  
來同觀玉淵先是澗水犇衝遇大石上侈下歛懸布  
瀑射極其雄壯濤頭瀆湧散爲玻璃色記言沙石萬  
數古今不塞誠下通於海矣相對有寒泉亭泉自山  
出按記文訪羅漢巖寶陀巖于僧堂之後皆無知者



廬山行錄  
山上竹樹間多崖石其下有觀音泉疑自寶陀巖而出稍加剗治必得之其南有小徑疑白雲庵路也飯罷遣徐道人乘驢歸詠真同骨肉再過三峽橋裴徊久之始知過橋之泉爲陸子泉其旁有沈錫大書廬山二字行小路望五老峯了然便道入高遙景德院亦舊屋有元豐間無爲子題字老僧年八十二云李徵右書堂僅一里今廢但刻其名銜于石洗滌乃可見進至萬杉院上滴翠亭餘具三月記中又二里入開先登漱玉亭度橋俯澗澗中石含雲母如記所載天寒甚太

守適致餽徧飲從者而行澗外招隱橋近爲寺僧徙數十步而招隱泉無人知者物色久之得於二百步外叢條之後石井依然三酌而歸路口有披雲亭稍前卽古楊梅亭基又稍前當四達之衝卽古四會亭而俗子改曰屏翠矣回望山色奇甚倒載而觀之紫霄峯劍立衆峯之間鐵塔僅如一線將至軍城一里有承天院臨溪湖僧嘗被盜殺三人今遂不振入西門日已暮昔白樂天記匡廬奇秀甲天下誠非虛語陳氏山記北起江州盡圓通乃轉山南起康王觀迄



吳章嶺其序如此予今自南而北與之相反故問津多誤然記中指名奇特處十得六七其餘當路者遊迂曲者畧異時再以旬日窮探極覽可使無遺蘊矣初南唐元宗賜田給諸庵巖故所至有產業中經李成焚蕩十存二三又稅重租薄僧道往往逃移寺觀日以摧毀近雖稍修復而廢絕爲多惟舊屋則氣象終可愛舟中賦四韻云南北周廬阜東西徧九華宴安無醜毒痼疾有煙霞淡薄村村酒甘香院院茶馳驅君莫厭此出勝居家壬戌五更雪打蓬平明出別

郡官望廬山已橫白練欲解去南風作章德象游落星詩云來游未盡登臨興且喜南風阻去船殆爲予設飯罷遂携家棹小船往焉寺去軍城僅五里水乾則路通今歲尚深丈餘按圖經石高五丈周回百五十步九江記云尋陽湖內隕星化石上連彭蠡下接潯陽其石圓潔不生草木峭然孤峙獨出水際寺興於唐景福年天祐二年賜額福星龍安院本朝祥符二年例改法安南唐戊辰歲卽本朝開寶間宣義郎湯爭撰記云保大中寺僧修葺元宗嘗臨幸僧齋已范文正



公章郇公王介甫平甫程公闕蔣穎叔黃魯直父子  
郭功甫洪駒父皆嘗留詩文龍圖閣學士吳仲庶

中復

猶酷愛西軒更名曰嵐漪魯直詩云龍閣老人來賦  
詩謂仲庶也出邑滿眼湖光千里真世間之絕景又

嘗有玉京軒今皆廢但存清暉閣

或云保大  
中命名

西對廬

阜如青天翠屏初至白雲英英起山腰少焉散漫俄  
復退歛已而山坡絮帽變態不嘗舉酒賞之不覺徑  
醉午後移坐佛屋之前東南觀巨浸右爲揚瀾左爲  
左里其中兩山如門是爲鄱陽湖由寺門而望則東

北直宮亭湖西南軒牕對流清山其脅亦有湖汊西  
北乃軍城也再舉酒而歸晚自舟中望山色不勝眷  
眷再以小艇入西草湖過東古山下觀釣魚臺鴻雁  
鷗鷺徧野見人驚飛轉而之流清港上流清庵庵在  
鳳凰山古殿殘毀慨想承平之遺址回棹已曛黑過  
落星聞鐘聲徃復殆二十里癸亥早發南康北風微  
作已而轉南過左里揚瀾泊珠溪而北風復作去軍  
城已八十里有巡檢司及小市登岸北望廬山甲子  
南風晡時方行四十里至吳城山謁廟畢登望湖亭



猶見廬山也殿左有穴如井異時湖中或損米舟則見於冗中謂之神倉云

九華山錄

宋 周必大

九月乙丑朔丙戌入清溪水碧色泊弄水亭入門卽  
池州州治謁太守同年趙朝散彥博富文提舉常平  
李承議庚子西通判陳朝散璘同年湯平甫知縣適  
在此丁亥都統制寧國軍承宣使時四廂俊及其子  
閣門祇候政貴池宰趙宣政芹司戶袁迥功祖嚴趙  
修武公頎並相候約湯平甫共飯同渡陳公橋淺水  
橋秀鮮橋遂至齊山山脚插入清溪石色青蒼可畫



洞穴半出水中泛舟扣其戶而返步登延慶先爲指南環寺巖洞可見者羅漢殿後曰妙空巖在大石中次曰丹砂巖俯僂乃可入片石斜出扣之聲控控然四旁屈曲皆奇石也法堂之下曰蕉筆巖亦名唐公巖有黃大臨諸人題字山之上曰春流泉進窺無底洞歷武功巖遂至觀音巖巖本名上清兩崖對起三面環抱有程正輔蔣穎叔題字右轉登寄隱亭西面皆翠石有小巖刻寄隱巖三字其前有熙寧甲寅重陽日太守劉敦思甫題名東北乃紫微亭故基面淮

南諸山下臨秋浦清溪直接大江眼界豁然又其旁拔起數峯奇甚謂之小九華蓋與上清巖皆齊山最勝處也崎嶇行峽中僅可通人稍前曰大石谷又稍前曰定力窟深不可測又其上卽翠微亭是爲山巔杜牧之云江涵秋影鴈初飛此地此時也東望碧峯劍立於遠山之坳者九華也南望大山橫陳者太婆嶺綠諸峯也北眺州城邑屋可數大槩主山自紫巖蜿蜒西來其左卽貴池口輿地志所謂梁昭明太子食貴池湖魚而美者其右卽清溪秋浦望之全類臨



安之西湖而一隄隱然屬城亦類蘇公堤此又登臨最勝處也予賦小詩云地占齊山最上頭州城宛在水中洲蜿蜒正作長虹墮吸住江河萬里流又天遣江山助牧之詩材猶及杜筠兒向來稍喜唐風集今悟樊川是父師久之由別徑下九頂洞上有九頂圓如盤覆中頗平廣有磐石可坐嘉祐中因太守王哲易名集僊宮洞後有穴側身可過一小洞也竇穴上穿頗類月巖而其背山上乃唐觀鄗樓基王哲易名青霄亭今亦廢其下曰獨秀巖翠壁橫峙可愛訪左

史洞爲馬軍寨所限出寺行里許乃至焉實寺之後山也其深數丈可達於外左史謂李方玄景業也杜牧之代景業來守故爲立名而張祐書之又有石燕洞大抵皆石也遊已還寺再登翠微亭置酒時侯趙守致餽平甫賦二詩予次韻云上清別殿舊通明僊聖飛騰戶不扃出谷尚疑窓列岫絕堤始露嶽真形奇奇怪怪無非洞下下高高總可亭但把曛酣酬絕景天風吹面徑須醒相君早日翼天飛晚落江湖事以微好事一時開翠壁佳名千古記黃扉朝遊要及



九華山錄  
三  
雅翻樹夕返何妨螢濕衣更得湯休奇絕句後求誰  
憶謝元暉甲夜歸戊子早至郡齋中和堂登蕭丞相  
樓復游景德禪寺訪見山堂爲添差路鈴王宗所占  
排闥造焉見山而已次過天慶觀讀徐鉉碑李煜紫  
極觀也已後赴提舉司會荷池中有秋浦堂頗幽爽  
會散出北門二里登貴池亭俗呼望江亭以其見大  
江可望淮南也亦見九華諸峯亭久廢今方重立歸  
上南樓南門城樓也正對齊山循城而東有拱翠樓  
亭隸邑廳又稍前卽九華樓三者相望皆下臨清溪

見九華大抵爲太婆嶺所障不能盡見諸峯太婆山  
極高而其名不典圖志亦不及之已丑赴州會坐中  
見梅花賦小詞云踏白江梅大都玉斲酥凝就雨肥  
霜逗癡騃閨房秀莫待冬深雪壓風欺後却嫌伊瘦  
仍怕伊僝僽營妓曹盼頗潔白淳靜或病其訥而不  
頗戲以况之已夜富文出家姬小瓊舞袖翩翩往聞  
范至能云頃朝士姝麗有三傑謂韓無咎晁伯如家  
姬及小瓊也禁中亦聞之又作小詞云秋夜乘槎客  
星容到天孫處眼波微注將謂牽牛渡見了還非重



理霓裳舞都無誤幾年一遇莫訝周郎顧富文近再  
醮有所競而設榻於外時候方爲兩解故戲之如此  
庚寅早欲如九華而雲夢宋宰及歸州助教張蒙正  
相候過午乃能上馬時候差中訓郎趙良弼等同行  
辭之不可五十里至鐵券山投宿葉蒼秀才家蒼有  
子楠登進士第山深夜甚寒辛卯早再赴葉君飯乃  
行尉亦並轡二十餘里至青陽縣令成文林雩丞熊  
從政實褒主簿陳朝立巡檢程大夫同來迂館於驛  
中尉廨卽宋齊丘宅其旁對九華而齊丘之墓在牛

心山下去縣東五里赴陳朝立會以能仁院爲廨傍  
有妙音院同至縣學登經史閣望九華紫翠千仞造  
物融結奇巧真尤物也縣東二十里有潮洞大如卓  
面而石穴極深日三潮每潮魚蝦輒先出壬辰早同  
陳薄葉尉趙忠訓出郭十餘里登雙練亭度西拱嶺  
入龍安院自此徐行歷永安塔虎跑泉過石龍口虎  
跑嶺此兩處地勢稍高望雙峯九子甚奇遂入廣修  
院去縣已二十五里院宇頗雅潔寢堂望雙峯幘峯  
真人峯蓮花峯是爲五老峯步至上雪潭源高而遠



仰視蓮花峯正如所倚之屏其前卽石門水所注也  
峭壁削成懸瀑十丈怒濤駭浪不減三峽或瀦爲深  
淵或散爲犇湍雷轟電擊約二百餘步爲下雪潭其  
間多大石水平布者數丈潭中產石班魚不常得有  
瓔珞泉水跳石上如貫珠尤爲奇絕而土人不貴也  
食罷轉山而行終日觀山面殊不厭約十餘里入無  
相院有觀音閣對峯巒數重留題而去又二三里至  
協濟廟神兄弟三人日方晡或謂化城遠不可到遂  
止陳朝立置酒中坐帥諸人下九華溪踏石涉水以

爲戲葉尉體肥甚獨墮水中溪自龍池來欲訪其源  
或云路太遠惟禱雨乃至今蕪穢不治不果行終夜  
如大雨可聽癸巳早隨溪而入至亂山環合處登化  
城嶺嶺峻窄時時回望諸峯層出殊快心日少休半  
霄亭已時至化城寺寺宇甚佳唐時新羅王子金地  
藏修行之地飯罷謁金地藏塔又在寺後突然一山  
上常時可望大江是日適爲晴嵐所蒙僧祖瑛獨居  
塔院獻土產茶味敵北苑陳朝立以翰先歸邑乃同  
葉趙行二里訪龔泉其傍乃李太白書堂基今爲張



氏墳地自此下嶺過苦竹坑俯視羣山左右對列中有平田氣象極好稍前卽寨頭蓋建炎間張遇寇青陽縣官移治於此真關隘也行近懸橋雙瀑石山對瀉未經名人品題故無聞焉又行至蜃盤嶺而化城峯盡矣化城九華最高處蔣穎叔嘗有悔游之語俗傳十里殆不止此賦小詩云攀蘿度險捷猿石角鈎衣屨盡穿莫訝遠尋金地藏也曾徐步玉塔前又數里至龜山一上復數里尤爲險峻有崇壽寺慈寺閣對雙劍峯又賦詩云注坡緣壁化城中客慍奴嗔

我亦慵及至龜山還一上爲憐高閣對雙峯寺僧善修年八十六贈以詩云老僧九十視耽耽二十年來不下山我得九華克法供亦能禁足老山間日尚早愛其景物遂宿焉甲午早下龜山行十餘里入聖泉院泉在院側石巖下號無底泉試之僅二丈蓋游者未嘗測其淺深耳水自巖出甚清駛中有五色石罷卽行過慕善鎮回望九華橫側高低無一同者又五里至曹溪寺又五里至覺安寺五溪合流於此故地名五溪又五里入大路過鐵券葉元質別去又二



十五里投宿馬牙酒坊二三里有常安寺夜不果往  
陳朝立自青陽致饋是行自西洪嶺入山蓋西南也  
終日觀山面既至聖泉蓋自北而出所謂山之東乃  
山背關聞有廣福等院甚佳而從者猥衆頗不自由  
不無遺恨十月乙未朔早自白沙入小路數里遊雲  
光寺寺亦華煥登閣望六尺圖屏欲少留而提舉常  
平李察院領客將至留二小詩戲之云來如負弩先  
去爲乘驄避江祖一片石留伴幽人醉又云作者正  
七人飲中空八仙長齋詎容醉晉也合逃禪遂同趙

生過江祖興道院主僧行餘置酒訪李白祠堂但有  
廢牌在壁角令行餘道至石邊攀緣而下得小舟同  
泛清溪水正碧色下淺灘數里至玉鏡潭水自南來  
觸岸西折灣環可喜潭深纔二三丈云李白詩云江  
祖一片石青天掃畫屏又云溪水正南奔迴作玉鏡  
潭皆實錄也塗中占小詩云清溪水色勝於藍祖石  
移舟下鏡潭妙絕畫屏并碧玉謫仙不見與誰談晡  
回至弄水亭以五盃酌趙生徧飲從者晚趙守在九  
華樓上梁就見之



金華游錄

宋 方鳳

己丑歲正月謝翺臯羽方鳳韶卿約遊洞天十一日  
辛卯韶卿攜子肖翁入邑與臯羽及陳公凱君用弟  
公舉帝臣會韶卿夜賦詩示同遊者十二日壬辰陰  
寒韶卿拂曉取道上洛之吳溪過吳似孫續古約俱  
行至橫溪訪柳時聲父子君用不至帝臣從五路嶺  
先過門臯羽繼至會宿時聲居十三日癸巳枕上聞  
雨是晚以雨宿柳明府新居各賦一首十四日甲午



陰未曉卽行午度太陽嶺晚泊上坦欲訪雙巖鄭子  
有子有聞之先至旅寓邀宿陵雲山房城友葉謹審  
言適相遇於陵雲約翌日同至赤松是夕子有出家  
藏先資政北山先生遺墨及久近諸賢書帖共觀至  
夜分韶卿書北山感雪竹賦後臯羽亦題十五日乙  
未曉聞窗外葉聲疑雨起而視之則霽旣飯話良久  
子有之姪復留飲凝香閣晚抵赤松自源口入一里  
許萬松矗翠有亭跨中路扁赤松山舊樞密潛齋王  
公堊書今往觀唐元素易以他書矣沿溪入橋亭扁

金華福地郡人潘繼先篆過橋入三門勅寶積觀額  
大中祥符元年所賜與殿中四錦旛及獻花四木孩  
俱今猶存入門而右有堂臨池上爲濯纓堂默成先  
生潘待制良貴書入而爲松遊亭又入而爲枕流亭  
觀之前爲臥羊山卽皇初平叱石成羊處也道士王  
元台謝天與款宿謁冲應養素二真祠二真初起初  
平兄弟也松下有遇仙石坐其上相傳往年唐公李  
度有目眚寓觀中嘗憇茲石遇二仙問故采草拂其  
目遂明且祝曰後十八年當相見彬州及唐登第授



彬教有二道士過之唐不知省道人曰子亦記松下  
治眼時語乎旣而邀之不知所適方知爲二仙云時  
韶卿病目甚故道士言之爲詳回宿王謝房各賦上  
元遊赤松詩十六日丙申微陽道士水竹唐元素妙  
虛王德厚竹泉倪守約房中觀羊石其詳具臯羽觀  
羊石記中云金華洞爲皇初平叱石處予髫而聞之  
髮種種乃一至而叱石處復不在金華洞未至洞十  
五里有山曰赤松今爲寶積觀觀旁祠二仙二仙卽  
皇初平兄弟是其處也石故在山之巔變怪牴牾宛

然如羊形多爲樵牧及好事者取去道士拾其餘蓄  
觀中余得借而觀者三處其一在天井東僅十數角  
嶄然群伏且起狀無抵觸意苔蒙茸若草藉地可近  
而玩其一並曲池之岸纍石爲山參布伍列犬牙其  
上臥者十八九伏者十七抵者蹶者十五履險而跂  
者十三倚而齧跪而乳者十一若觀古葵尊之跡于  
石形不求全而意自足其一積小坻位置加密跂伏  
齧乳抵蹶與前變態畧同復有拱而人立者奇崛特  
甚非前所有道士易以它名使不與群羊伍余曰是



金華游錄  
不可易左元放之遇曹瞞其化而爲羊與茲羊之化  
爲石是或一物也今而後觀茲石馮而遊若脫而休  
茫乎日與之對而泊不知所求其有不復化爲是物  
乎道士顧笑衆皆沈寂起立若植以余言爲然故書  
以啟後之遊者其所觀三處道士曰倪守約唐元素  
王德厚云石去初平仙後若干年爲樵牧好事所取  
又若干年爲樵牧好事所取又若干年道士悉能言  
之於遊者非有繫故不書妙虛石旁有方竹一叢蕭  
疎可愛堂名蕭間樓有減筆隸物化二字極佳水竹

留饅王倪各爲煮茗入小桃源路口有小桃源物外  
洗耳三石刻奇古皆餘杭虞似良仲房八分書未過  
橋爲物外亭過橋有亭泉上有臺名滄浪溪石皆磊  
砢水激射爲峭峽爲盤過道士徐南華攜酒肴并青  
窻王易所書趙元清夢游小桃源四時詩來青窻卽  
故樞密王公之孫名進思官惠院號淳齋善書而好  
吟以避世立兄子爲子使出贅復分田送其妻歸母  
家而自爲道士於此南華酌酒滄浪臺榭陰下行至  
巖扉間新構小亭名別有天地復酌亭上巖扉有諸



公題墨新種桃梅來道道士周雲巖世昌要會酌樓  
上石泉之徒王德謙益之携琴鼓再行午從觀右登  
丹山行窮林巨石間觀丹竈及丹石相傳某年丹光  
見石上有道人養雞見雞啄丹取之丹卽飛去今立  
祠與菴祠前舊有老樹並其一中斷倒架上半於其  
一附着而生下半則僵立不相接狀甚怪奇今爲改  
祠道士伐去曾遊者以爲言丹山而左稍下有丹井  
泉極甘冷一徑出小桃源之上抵二仙祠回宿寶積  
觀中西廡石刻赤松山三大字李陽冰篆偉甚以赤

字從大下作火揭之有火災故寘不用而存其跡云  
十七日丁酉雨往欲三洞不可遂入城泊祥符寺待  
霽取道智者以往十八日戊戌雨留祥符臯羽有塔  
影霧中深之句韶卿足之十九日巳亥套入寶婺觀  
謁星祠登八詠樓寶祐丙辰歲郡守謝奕修改創潛  
齋王埜書扁今易以他書矣時拏丁夫急所帶奚奴  
不敢出市衢韶卿自同臯羽訪芙蓉盛太博共談世  
故晚歸祥符二十日庚子新霽約審言自蘭溪門會  
于北柵韶卿父子續古審言登七寶寺塔樓拂塔院



至道年碑石遇且庵徐玉汝於盧士安卜肆韶鄉臯羽甚欲留訪諸老以雨餘得霽重於妨衆遂行既出城遇抑齋劉權院梅居邵深道成齋王玉成於菱塘之東王謝二道士自赤松來西鹿田寺僧懷玉留而相導韶卿賦北山道中衆客皆和晡至智者寺山路有亭扁北山唐乾元二年八月縉雲縣令李陽水篆書入而爲倚松亭過橋有亭扁靈源小憇亭上又潛齋王公書靈源勝地四大字寘之雲堂後廡寺僧莫之貴也日夕過鳳凰山法清院山形如鳳凰舊爲法

本晉開運二年爲國泰今改法清山西有一怪松偃蹇如盤龍院僧圓矩云昔潛齋王公嘗護以闌楯遊憇其下是夜宿院中二十一日辛丑有徐生館法清酒狂士也曉起攜詩見贈有鳳凰山上鳳凰翔之句聯中又以畊田鹿化石羊爲對臨別密謂審言曰余以鹿比僧羊比道士鳳凰比諸君子審言途中述其語衆皆絕倒從法清而西過故康懿泰國長公主墳園未至觀半里有岐徑行五十里至金華觀登山可至九龍寺上有劉先生講堂劉孝標讀書處也三



洞上爲朝真中爲水壺下爲雙龍三石扁皆飛帛書  
立下洞口觀有天下名山四大字觀之左爲椒亭所  
從入洞路也以山下平地言之此則山巔然而迢遞  
寬衍觀之前居民成聚則此乃洞天之趾爾雙龍洞  
口石室明淨坐可三二百人仰視石室紺碧其隱約  
可名狀者爲雲物爲仙桃爲道人比肩而立龍首見  
其左而尾懸右石壁上又懸石至地獨黃色俗呼呂  
先生藏身霞衣挂其旁有北斗星窠洞穴如墓頤水  
淙淙從中出卽流入右偏暗出洞外溪澗衆束炬揭

裳偃僂踏水入內洞凡三數丈首背皆擦石舊臥小  
舟而入今敝漏閣水際旣入復虛曠如外洞水從右  
流莫測其淺深執炬者一一相指告見蜂窠石水蛙  
石石鍾手搥之鐘聲仙珠纍纍貫巖上石門限雪山  
山前雪山後雪梁之皎然仙笠懸巖石石鼓搥之鼓  
聲有形蜿蜒頭角鬚尾凡二屈蟠隱見瓜尖皆白石  
如玉所謂雙龍也猶一獅子一頭足尾其額有珠大  
龜黑色白蛇斜繞其背首入甲下奇甚筆格一霜岬  
粲如繁霜有卷石小窠指面大有水正滴窠中名仙



金華游錄  
人硯滴候片時纔一滴仰視洞中他無漏泉獨此爾  
浴室石櫺三足蟾懸鍾寶蓋如名刹講臺上所設而  
加高大海角虎蹲立雲霞五色欲飛極裏從暗處俯  
伏遠望洞口水中所從入處僅一小隙透明如十五  
夜月名仙人望月又大象足二小一仙桂水波石粼  
粼然大者如浪轉雪山後而左爲滑臺爲池爲畦  
町高下可數仙人挂衣橫十數丈衣純素祛褻蹙摺  
皆天成又仙人眠石方整可臥仙人帽日月二宮復  
從洞口踏水而出凡洞中所見不假一毫鑿鑿而形

狀自然其妙處殆不可言也登山幾半里至中洞洞  
口視深處乃暗穴但聞潺潺水聲束數炬相後先若  
入井然稍斜向內衆魚貫而下石滑且險約三十丈  
至水簾自高巖噴出下有巨石盛之卽不知水之所  
往水簾出處前有懸石如鍾又如飛鳳視水簾以下  
復沉沉深黑人多不敢復入臯羽毅然揚炬而前韶  
卿續古從之由水簾之右轉而深入巨石無數回視  
水簾乃在目前愈入愈深下復無水有石筍入空曠  
中高可三四丈色瑩如玉從石筍而下極底有石室



金華游錄  
燥潔曾遊者留題在焉回至水簾漸可望明而上不  
如入之險也然不能深入則不得盡其奇來遊者率  
望水簾而止尔又登山二里韶卿父子臯羽續古倩  
兩山童買竹筴束炬至上洞入洞而右爲觀音洞從  
巖罅越石隈而入展轉愈高扳援至觀音前其石像  
天成垂衣伸一足如土偶者但高入巖罅以炬燭之  
僅得其半而臂與面莫盡見也旁有潭深不可近名  
觀音井又名龍潭復路出從大洞正面而入歷三數  
坡陀其石上雲霞波浪霜雪屋室之類皆不減下洞

所見洞口天日之光斜射洞中石崖上淡如月色奇  
甚內有石梁高挂深可二三十丈白龍護其左蒼龍  
護其右又入有天池深廣四畔峻壁不可下池之裏  
有嵯如兩扉而啟其一極黑暗中遠望石扉啟處天  
光下燭蓋洞天漏明而人莫知其處名一線天旣隔  
天池不得復深入也雙龍洞口題名石上韶卿賦三  
洞云金華北山三洞天垂髻欲往今華顛春風吹衣  
雨洗履瘦筇忽拄蒼山煙山高地平走幽澗根絡石  
上森楠榎步從飛橋瞰石洞厓色閱世知幾年風痕



金華游錄  
霧迹化異物龍首昂左尾右旋就中暗穴如墓願急  
水瀉碧鳴嫺絃遡流束炬照徒涉肩皆擦石行拳孛  
水窮路夷內景得以炬交燭窮幽玄細紋蹙波湧振  
接皎彩凝雪飛霜鮮大爲獅子虎犀象瑣碎亦復蜂  
屯然蜿蜒雙蟠角尾具一一玉瓜擎蒼堅窮龜負甲  
色深墨長蛇白質相縈纏鐘能鐘聲鼓能鼓不假樅  
簷知誰懸直櫺斜檻藏涵室短畦長町移原田青雲  
白霓五色霞咲盡敗絮留丹鉛中途經過最深窅伏  
身低眺洞口泉空明一隙隔遠見秋蟾浴海光嬋娟

左巖袈衣頰橫亘疊摺衆皺垂蹠躑自餘神恠不可  
極似鑿非鑿鑄非鑄出登山腰叩中洞外視石井聞  
潺潺入深踏險思槌綆長竿揭炬後且先水簾可俯  
心爲掉到此十九歸言遄嗜奇不憚歷磊砢足以目  
故差輕便翻身却望水簾處銀河天落懸吾前常情  
疑復下百尺積水定作神龍淵石乾徑闢却易進玉  
筍拔地修而圓宜爲淵處乃爲屋亦或摩挲題新篇  
同遊疑我久未出笑謂豈欲井底眠林幽風起日已  
晚猶睨高洞山之巔薪蒸可買樵我導不遠數里仍



金華游錄  
攀緣傍從右壁入深圻如鐵戶限瓊爲檐儼然海相  
挂珠絡熟視豈信非夸傳左爲朝真正面入便想笙  
鶴遨群仙雲霞波濤仙衣裳奇詭豈必下洞專歛然  
修梁架巖起左右蒼白龍形全望中極底勝漆黑雙  
扉隱隱起半邊天光一道燭扉內知此明罅從何穿  
窺深壁峭不可往安得插羽如飛鳶嗟余茲遊尙牽  
俗身所驟歷辭難宣但思乞水學坡老洗眼看字消  
餘年是夕僧懷玉同歸西鹿田寺止宿寺丈室後有  
奇石峭立罅圻間可行林泉幽勝特甚默成先生潘

公大書其處云余往來南北兩山餘二十年獨未曾  
至鹿田紹興七年四月十七日同智者長老法銓來  
於崎嶇險隘之中得虛曠寬閒之地修篁喬木巨石  
瀑泉氣象雄偉此蓋未之見不獨甲於金華也自是  
評吾鄉山水以此爲第一云其丈室遂榜第一軒上  
爲思賢閣是夜聽雨軒中二十二日壬寅曉霽過東  
鹿田寺廊廡列詩石內有葉丞相衡集杜五言四韻  
中二聯云水花分塹弱山水抱雲稠更宿招提境還  
同惠遠遊又僧舍壁間有郡倅金陵吳琳題詩中一



聯云雲暗雨來疑是夜山深寒在不知春潛齋王公  
嘗和其後行數里至潛齋所營山橋穆陵御書山橋  
書堂四大字下有懶瓚巖巖上有亭亭之西有石筍  
又旁巖臨溪爲亭臺遠望州城城中之塔鑽小雙溪  
如篆紋路口有亭扁北山今亭臺皆蕪廢旣下山王  
謝道士登山取別徑歸赤松至潛岳寺前帝臣審言  
同入城韶卿臯羽續古肖翁取赤松源口虎頭巖下  
道遇雨抵上坦旅宿二十三日癸卯曉霽近午度太  
陽嶺晚宿柳時聲居聖傳之蘭溪留詩以待續古先

歸二十四日甲辰過松巖陳粹翁午與臯羽別晚復  
雨二十五日乙巳韶卿父子回抵吳氏書塾客有問  
金華勝遊者韶卿以詩叙其槩云赤松上下雨霏微  
八詠樓頭重拂衣西港晴來汀草長北巖幽處洞泉  
飛風敲定磬鹿春過月滿丹臺鶴夜歸歷覽因知古  
詞客盛誇雲夢未全非臯羽歸後作金華同人物古  
蹟記



大嶽志

明 方升

刻志畧之閱四月將訖事升述所以作之意授之工  
曰升少時則聞武當奇勝甲天下裹糧走觀之亡一  
乘之便卒莫能往嘉靖癸巳督屯唐鄧間庶幾望見  
諸道子之宮而又不肯越他境以勤邑人乃止甲午  
提調 命下升奉以趨曰茲命也將得以指揮其宮  
事行有辭矣明年三月既至觀于爭樂曰美哉巖巖  
乎上逼太紫而下壓城闔也哉抑大者三十六焉今



見其一未覩其餘也觀于玉虛曰又有大焉其文皇之餘烈乎吾聞之費而不傷勞而不怨觀于五龍曰美哉神仙窟宅也其東則青羊太上之所經也其南則桃源希夷之所夷也觀于南巖曰美哉天作之者歟地生之者歟人力不至此觀于紫霄曰美哉傳有之天下七十二福地此其一也觀于太和曰美哉亭亭乎吾不知其幾千萬丈也其去地益遠而去天益近也乎日月出沒在下矣嵩高泰華不足言矣既歸取誌讀之曰該矣悉矣無所不載矣讀之卒篇曰誇

而俚博而寡要其猶有盡乎乃忘其愚輯爲此編汰十之五增十之三爲之彙枯一百四十六處杜述者十有九首類爲五卷旣脫稿唯災木是懼質之少監李公曰雖然不可無刻也遂刻之嘉靖丙申長至日

### 太和宮四圖述

宮在天柱峰之上舊有小銅殿一永樂十四年始撤小殿改治大殿塗以黃金制極工緻其梁楹鈎合處渾成若不假繩削者殿之外爲臺臺外爲檻檻外爲城臺下置石梯懸崕間高出木末飛鳥皆俯其背人



行其上若乘空按掌跼趾目不敢旁游舉武則股石  
搏乃護以石檻聯以鐵鎖使可憑可引盡數十堦則  
橫折其磴使稍就平可坐城闕四天門以象天闕儼  
然上界五城十二樓也殿上觀日之出如火之發于  
足觀灑氣之往來太虛如呼吸之氣之出于口殿前  
諸峰不可盡名其對峙而起逼几案者呼蠟燭峰其  
下跪者揖者拜且舞者羅而立者執戟而衛者摺笏  
而侍者冉冉而下如羣仙之擁絳節者源源而來如  
諸侯之捧玉帛者皆作朝謁狀蓋天造地設以副我

文皇神道設教之盛心耳宮之制隨地之力不能相  
屬其大頂爲殿頂南北縮五之四東西揆者復十之  
一益以飛棧爲更衣二小室地旣窮右折而下于頽  
規山之曲爲朝聖殿爲元君殿爲聖父母殿爲講經  
臺爲真官堂爲龍池龍廟爲鐘鼓之樓厨庫之室地  
又窮又左折而踰小嶮出右脇之下或山曲四倍之  
復規爲方丈爲廊廡爲寮室地又窮陟自故道右折  
而度朝聖門繞出天柱峰後下三天門門下昔傳有  
尹喜巖絕壁不可尋三門皆連磴千尺從高山直落



或側道鈎出于石芒間下臨不測之壑堦累數十百級強直如弦投以小石子從欄間一躍便翛然下不及趾不止行者攀危欄緣長組仰脇息者數四然後得望一二其旁負土而爭出者爲巘累石而欲墜者爲岨山曲無復可窺者地又益窮遂剝磬砮夷斷齧以益之爲道房爲齋堂爲靈官祠爲祖師殿爲會星楹大小五百二十

### 南巖宮七圖述

宮卽天一真慶故址自大頂東走二十里有丘焉可

屋有泉焉可瀹莫如南巖其旁多重崦曲阜呀呷之壑嵌空之洞訪洙入時坐榔梅祠望北壁下懸岨置屋如棧道劔閣殊奇絕可愛由祠右行南岨百餘步度北岨岨深峭不可測中通一道如橫堵行者側足而上旣度升自南天門循山左支行數十步折行右支百步復折而左入小天門並岨陡折而行過大巖下山將窮而岨見擘岨之半爲大殿畢諸楹山復起突爲小阜復卽其上爲圓光殿殿下則黑虎巖也巖大如側鐘口處僅可伏從大殿後左折而東皆循岨



緣石欄屈曲而行俯視欄外數千尺目窮處正黑不  
得底投之以石無敲落聲陰風生於谷中若生騎數  
百弛枚而馳迅突不可當寒蟬暝禽鳴聲悲切令人  
毛髮灑浙戰掉不能休既東二十步折而陟嵯上方  
轉西行過元君殿入南薰亭亭窮嵯杪爲之大可羅  
胡床七八其上松風響細而長異他處有禽自呼我  
師常棲止嵯上亭外有石枰從衡十八道類今俗所  
彈者相傳爲洞賓故物復從元君殿折而下自是直  
東過磚室一石室一磚室曰獨隈巖石室曰紫霄巖

對榔梅祠前所望北壁下者也巖前刻龍頭橫出欄  
外四五尺其奉神謹者則緣龍頭置一瓣于其上以  
爲敬旁禮斗臺崛起灌莽中莫知所從登嵯上片石  
刻靈官像高五六尺亂置小竅中其數不能遍閱曰  
五百云又東過風月雙清亭值巖窮處二面皆倚石  
壁壁下坐可各數人可卧可眺可以觴咏然亂吹不  
時發亦不能久留也亭外石枰一如南薰所見者復  
從故道抵大殿後西望捨身嵯空懸若垂天之翼狀  
甚可怖其上爲飛昇臺玄帝改服于此臺下爲試心



石又下爲謝天地巖殿竝山爲楮室一爲神厨一爲  
碑亭二泉二日甘泉曰甘露泉言形露言色也池二  
曰太一曰天一太一水生氣天一水生數也殿之前  
偏右爲方丈其堂曰蓬萊之署從方丈左折行堂後  
其上分爲二道左出雙杉下爲五師殿右亂穿道院  
中爲圍堂爲浴堂爲滄水庫池池上有小閣道從之  
可通鉢堂由鉢堂陟翠微折行山之後則尋鄧真君  
所謂歛火巖者又轉而前平行山上北折而觀于崇  
福巖西下而復于南天門南巖之游於是乎始窮矣

紫霄宮五圖述

宮在展旗峰下故宮之側故宮今名香火殿負東小  
阜始使者入山將新是圖則觀其貌于堂樹于臺者  
赫如蔚如也於是乃議不毀別治于西大麓殿楹三  
故宮石屬十之其他建置百之日池一宮前左月池  
一宮後左七星池一宮前右真一泉宮後右上善泉  
一東方丈堂北大如盆中石鈎塞者半水從旁竅出  
日可數千斗宮中皆屬厭焉舊爲池名弗稱今更曰  
泉從殿後又轉陟山之椒根石壁爲龕者太子巖也



大嶽志 六  
巖前橫書太子巖三字其左曰蓬萊第一峰亦橫書  
巖下小園亭松風四入如敵百道巖上餘瀝颼牕前  
其散如沫下而出道院左復北上煉丹巖也下而  
出道院右復西上者七星巖也又上爲三清巖石頂  
不可到其下爲榔梅園正德年間令守臣歲取榔梅  
以貢太監呂憲乃移植數本于園自榔梅園東下又  
轉而南上爲福地殿殿兩堦下丹井二北爲萬松亭  
東爲賜劍臺相距不數武左右山斷而復圓起如小  
兒擎拳狀者大小寶珠峰也諸巖之水合而東流于

石脇者金水渠也渠廣八九尺北折過宮前抵小寶  
珠不得出鑿其項以行爲後渠旣出復東趨大寶珠  
溢于其趾爲禹跡池池大僅一畝湛湛堦戶間尤爲  
高山勝槩舊傳禹導山至此因名橋一亭一並綠池  
設池上仰見三公五老竈門福地諸峰轟轟霄漢之  
表或豎如笏或倚如劍或列如墻或錯如碁銳者毫  
攢斜者圭葵止者鴟峙奮者鶻突千態萬狀左右盼  
而目不敢暇焉自始釋平地下上五六十里至是凡  
得三大觀棲危巔憑太虛如承露仙掌擎出數十百



丈日月出沒皆在其下不如太和立神以扶棟宇鑿  
翠以開戶牖逞伎巧于懸嵯亂石間因險爲奇隨在  
成趣不如南巖右虎左龍前雀後武雖當廉貞貪狼  
二宿之下而環抱天成楹石所棲各有次第則非太  
和南巖之所得而有也故論太和之勝者于其高不  
于其大論南巖之勝者于其恠不于其麗論紫霄之  
勝者于其整不于其奇太和在上南巖紫霄並列于  
下足成三台矣

五龍宮八圖述

宮在靈應峰山曲南巖之游旣窮從其中以望五龍  
諸殿宇在扉屨之下去巖而北過滴水巖仙侶巖下  
青羊澗二十六七里山行多虎逆旅無三戶行者始  
持兵澗陷大麓下如行簷底已而南巖五龍皆失所  
在踰澗而西復尋山行陰磴苔甚滑崎嶇二三里山  
忽平樹忽壯景物忽佳於是南巖所望青羊所失者  
始欣然獲一投足焉顧瞻南巖又復如在眉睫之上  
矣宮東向逆折其門北向就澗道也宮門內爲道九  
曲十八折蔽以崇垣行者前後不相見玄帝啟聖二



殿階合九重前五重爲級八十一後四重爲級七十  
二望之如在天上真所謂上帝居也殿前天地池二  
陷石龍上中而垂其首于池水從龍口出注焉龍井  
五左三井右二井井痕不及欄者纔二尺寒冽可食  
碑亭三臺二丈有奇亭倍臺之半右廊之陰日月池  
碧色微綠月池深緇色字金魚各可數十頭殿之左  
爲玉像殿紫玉像一披髮跣盤右膝而坐沉香像一  
披髮跣端坐舊白玉像入供于內今像則當時所易  
者也蒼玉像一冕而垂紳雲履菜玉像一首飾不可

額微起至後如抹帕髦袍圓履碧玉像一頂左右  
結雙鬟素袍銳履諸像皆貌玄帝而大小各不同似  
非一時所爲者其餘從神二龜蛇二香爐連蓋一皆  
菜玉製龜蛇大者如蟹小者僅如錢香爐蓋刻獅子  
爲雙紉繫小毬隆起旁窄不掩爐瘞前殿丹堦內掘  
得之無款識不知爲何時物也殿之右出山坎大林  
下六石碑在焉皆元物也一爲崇封真武誥碑一爲  
揭傒斯所撰宮碑一爲揭傒斯所撰瑞應碑二爲戒  
臣下碑碑尾書至元三年其下又繫以龍兒年牛兒



半蓋當時制如此一什于地苔蘚所蝕漫滅不可讀  
宮門左從曲道北折陟左山爲榔梅臺臺上榔梅一  
株方盛發臺後有小石碑載賞李素希衣物勅二道  
其陰則尚書胡濙述上前面領論素希語也下而折  
左出大門外盡門下皆爲真官堂爲雲堂自雲堂並  
山西行下小谷澗水出焉所謂磨針澗也澗上有老  
姥祠澗出爲蒿口東流入于淄水宮門右從碑亭下  
南折陟右山爲啟聖臺折而南下行土途數百步側  
出一小山平聳如臺陳希夷誦經處也直下爲凌虛

巖復從故道折而西上規山微曲處爲自然庵庵前  
石作小池而橋其上金魚十數頭聞人咳唾從橋下  
羣起喉之庵藏李素希故物數事青袍一斜領博袖  
製不甚古袖襲裏各一皆用五綵布裁爲方寸間綴  
以成襲衣領直下不交襟不裳袖徑三尺二寸邊皆  
緣裏衣促製小袖襟左右交腰以下疊褶而舒其末  
不緣呂公綰一五色絲攬結而三令焉綬長寸半皆  
文皇時所賜也其頂爲靈應巖其外又有長生巖近  
巖數丈皆絕壁百仞下臨大壑橫一木于樹上以通



往來歲久木腐不可度

玉虛宮六圖述

宮在展旗峰北遇真故址爲真仙張三丰之庵真仙嘗語人曰此地他日必大興旣而去之四方聲迹寂然文皇遍訪物色不可得遂大其宮以爲祝釐之所殿之屬三曰大殿玄帝所棲也大殿之陰曰啟聖殿尊其所自出也左曰元君殿明授受也又左曰小觀殿初出之制未大也三殿合諸楹得大殿者半之元君小觀則入隘塢中夷山址以奠石焉亭之屬三

西塢西山下曰仙衣亭真仙昔嘗授衣者也亭後磚室一曰張仙洞神所游也室外銅碑一闕之遺也左聖水池池上室大如斗僅可置几案沐都尉讀書處也宮之前曰左右碑亭厨之後曰神泉井亭樓之屬一西塢北山下曰望仙蓋真杖履所及招之以其故也樓外雪洞一有兩臺洞光臺容相輝映雖亭午如出月狀堂之屬五石渠北曰齋堂石澗西曰浴堂宮門左曰鉢堂宮門右曰雲堂西塢北曰園堂故西塢則呼小園以別之齋堂前老桂三其最大者以指繫



之得二十二圍雖柯幹方盛然葉遲如子母錢花枝  
間時時綴數點不能多獨異香不減他植一本十圍  
空中立枯猶屈強如平昔一本十三圍偃蹇墻下若  
付是非欣戚于人者蓋皆百餘年物也院之屬二澗  
之東曰東道院智者居之山之西曰西道院仁者居  
之橋之屬六曰遇真曰仙源曰游仙曰東萊曰仙都  
曰登仙而石渠之所建不與焉門之屬三曰東天曰  
西天曰北天而殿中之所闢不與焉石渠一宮門之  
內廣八尺深四尺夾以石欄而橋焉中爲中橋左爲

西橋右爲東橋渠首起西山之麓水泉不甚大仰盈  
于驟雷滂潦以成其停蓄之勢延袤數十百武斗折  
蛇行入于東澗石澗一宮之東九渡之所經也自高  
山傾瀉而下澎湃數十里出右脇之間與石渠合西  
北爲梅東會于淄東北入于漢石鼓四南山之陽鼓  
大徑二尺二寸高殺其一以象四時或曰取其鎮也  
真靈祠二祀于門下媚竈之義也天地壇一前左南  
嚮禮以義起者也太山廟一前右北向時所奔走者  
也八仙臺一仙桃觀一華陽亭一蓮花池一宮外可



游眺者也曰方丈曰寮室曰書房曰賓所曰倉曰厨  
曰庫宮室之事不一皆非苟完者也

遇真宮三圖述

宮在仙關外始入山自草店行二三十里忽兩山阨  
于澗口口不復可辯循山趾下窮之始得其坎然狀  
從其上却望若逆流于山因憶桃源小口意其中必  
有佳境者前數武開朗夷曠可耕之地數百垓皆官  
壤也故遂爲諸道子所業阨陌相通殆不異桃源今  
代旣非秦諸道子類非避世者冠蓋相屬于道無復

昔日漁人之迷矣按宮先曰會仙館真仙張三半所  
築也真仙去今百四十年追尋遺跡于山水間無復  
存者行東廊下得觀所謂銅像西嚮坐戴笠內加小  
冠左右侍僮二杖一扇一笠徑一尺八寸中外旋攬  
如椒眼狀寸約二眼平布其裏裏漢間呼爲斗蓬杖  
刻龍頭左侍者執焉扇鏤蕉葉右侍者執焉皆糜銅  
以成形而襲之以金蓋三物真仙平時所御者也宮  
中道士云故物藏之內府入東方丈得觀所謂遺像  
身長五六尺面方紫平頰豐頤項腹如瓠自須以上



隱隱中起眉目修而銳其末微鈎而下垂髮纔二寸  
半納于冠半披兩耳後髮黑而䟽在領下者握之不  
盈把在口上者橫出磔如戟紫木冠藍袍袍製甚促  
直領窄袖不緣獨裙飄飄然有乘風上征之意繫呂  
公緇芒履見踵縛兩袴脛盡露于外右足側半武靴  
之若短荷笠曳杖行于松下考之圖誌真仙居菴時  
常獨棲大樹下猛獸不近鷺鳥不攬想像其人當如  
野鶴冥鴻臞然物表今觀其狀貌殊不類豈所謂仙  
者固亦土木其形骸耶

迎恩宮一圖述

宮在石板灘舊有關王廟蓋鄖襄官道也灘合山前  
諸小澗之水驟爲一川雨甚則潰潦四出行者半陟  
而水大至則漂溺隨之有司以漲落不常舟楫不時  
具於是初作石橋成化二年州大水橋齧且絕者百  
數而茲橋獨完或者謂玄武實相之乃治宮于橋南  
嵯以報神功以祈神庥宮成而諸美畢集焉清泠者  
日與耳遇飛泳者日與目遇天風弗作煙霾消歇則  
天柱紫霄諸峰劃見面目遂爲勝地始來游者唯亟



巫山行也過者僅立宮門外伸首一望竟去用是弗  
大顯宮落成于成化十七年中爲殿十六楹以祀玄  
帝殿之左爲堂十二楹六以祀啟聖六以祀真官殿  
之右爲廟十楹以祀關羽外又爲方丈爲書房爲寮  
室爲倉庫之舍爲庖湑之所百五十楹以居道衆太  
監韋貴疏其事以額請于朝賜曰迎恩觀

淨樂宮二圖述

宮在均州城北諸宮高或于山于巖下或于谷獨淨  
樂于市蓋卽其所封治宮焉考之圖經均古麋地也

傳稱玄帝降生于淨樂之國淨樂治麋按春秋文十  
一年楚子伐麋注水國近楚左氏敗麋師于防復伐  
麋至于錫穴應邵曰錫穴今均州鄖縣則入春秋麋  
固在也與傳所載不合今不可考矣麋君音舊誌作  
糜糜音糜糜字相近傳寫之誤也宮半于城中居民  
宏敞不及玉虛而壯麗過之崇其堂表其陛豁其綺  
疏文其璇題階墀門廡皆石平布旛幄之末綴玉以  
垂宮之爲玄帝啟聖殿者也宮左紫雲亭亭之制八  
稜其上去梁桶重簷疊拱而璇結于頂如攬囊口圓



起城中狀類垂蓋江行者皆見之亭下石階石欄二級可以環而走修竹長松遍植欄外類村塢亭外舍居者爲道人李大瓢不知何許人年八十餘人問其姓字不答與之錢不受飲之酒醉則起去亦不告也杖上懸方寸木書不語二字可否諸事任首長以瓢自隨因號大瓢宮右香錢庫凡鏹楮輸于山者悉輦以入累朝所賜諸器物金鐘玉磬之屬皆藏焉又折而右爲三方丈爲齋堂爲浴堂爲賓客之所爲道子之室爲案牘之房爲蔬藥之圃宮前亭二以度

御碑祠一以祀真官進貢廠一歲時上物以貢則董其役于此內臣主之宮外左爲提督之署前左爲提調之署前左爲提調之署前右爲五龍行宮出大東門望江東岸爲巨石立于山麓昂聳如馬首平如九高數十尺其上有亭曰滄浪之亭其狀酷似巖瀨釣臺然釣臺遠于瀨非百丈不可及又不如此之可以垂綸于亭也下而左行江岍百餘武復上觀音閣閣後有小石洞廣步有半入坐雖盛夏無暑氣與入語不甚了了相與奕其中敲子聲隱壁案間久不得出



下閣復拿舟順流行六七里抵龍山山橫絕水口屹  
然有一夫當關之勢地理家所謂華表捍門者也山  
上禹王廟一玉皇閣一臥雲亭一山下三義廟一皆  
附于宮可游者也



